

„Droschak“

ORGANE

de la Fédération

Révolut. Arménienne.

ԴՐՈՇԱԿ

Adresse:

RÉDACTION DU JOURNAL

„Droschak“

GENÈVE (Suisse)

„ՀԱՅ ՅԵՂԱՓՈԽԱԿԱՆ ՊԱՂՆԱԿՑՈՒԹԵԱՆ“ ՕՐԳԱՆ

ՎՃԻՐԱԿԱՆ ԺԱՄԸ

Չը խօսինք այլ ևս մարդասիրութեան, աշխուհիմի, քաղաքակրթութեան մասին, չ'օրօրինք այլ ևս պին ու պատիր յոյսերով, հզօրների յմարդասէր՝ աջակցութեան խոստումներով. չա՜հ չոր աւետարանն է ղեկավարում ամենքին, թէ մեր յհամակիր՝ և թէ յթշնամի՝ պետութիւններին. համակիրը վաղւան օրը կարող է դառնալ հակառակորդ, թշնամին կարող է դառնալ բարեկամ. Աշխարհը—Առւթին է, բիրտ ու վայրագ ուժին... Այն մի բանի զինւած, ինքնապաշտպան խմբերը, այն մի շարք յաղթական գրոհները բարձրորոտ խուժանի դէմ՝ աւելի արժեն, քան տասնեակ demarche-ներ, յիշատակապիրներ, ուղերձներ. Ուժն է, որ վերջին հանգիւստի մէջ թելադրում է իրաւունքի նւիրական պահանջները և եթէ կամենում ենք մեր տրորւած ու դարւաւոր իրաւունքը լսելի անել հզօրներին, պարտաւոր ենք ոյժ կազմել, — մի ոյժ, որ էապէս խաղաղասէր է, ժխտող արիւնի ու բռնութեան, բայց մի ոյժ, որ գիտէ, ընդունակ է ի հարկին պատւար կանգնել իրաւունքին, իրագործել իրաւունքը, խռովելով մշտապէս դիւանագէտների եսապաշտ և իրապաշտ հանգիստը...

Այդպէս է շնչում հայոց խուլ աւանջներին ամենօրեայ իրականութիւնը, այդպէս են թելադրում իրենք իսկ դիպլոմատները և նրանց հետ՝ հայութեան բարեկամները. Այդպէս ենք բարոզել մենք ևս—հազարաւոր ձեւերով—մեր ամբողջ կուսակցական գոյութեան ընթացքում, Սահմանադրութիւնից առաջ և յետոյ... Բայց քանիսն են ըմբռնել այդ մաշւած ու հետեակ ճշմարտութիւնը. Չե՛նք կրկնում արդեօք 1878-ի աղետաւոր դրաման. Չե՛նք արդեօք հետապնդում նոյն յփայտէ շերեփով, նոյն ունայն աղերսանքով՝ մեր արդար իրաւունքի կիրառութեան. Չե՛նք արդեօք մոռնում հոգսերից ամենաէականը, պարտքերից ամենամեծը և ամենահրամայականը...

Իւ ո՛ր է ազգային համերաշխութիւնը, որ քանիցս չէջտեցին ու դրւատեցին մամուլի մէջ... այն գործօն միաբանութիւնը, որ աղողութեան գրաւականն է...

Հայկական համերաշխութիւնը իրագործւած է միայն

զւ միայն դիւանագիտական ձեռնարկների ու թղթերի շուրջ...

Այդ էլ բան է, կ'ասեն ոմանք. Շատ քիչ բան է—կ'ասենք մենք—և այդ կիսատ, հիւանդոտ, կրաւորական համերաշխութիւնը արդէն իսկ ողբալի մի նշան է քաղաքական անչափահասութեան և թերեւ նախօրօք դատապարտւած վիժումի...

Հայ բուրժուազիան, թեւաւորւած մի բանի դահլիճների վերապահոտ խոստումներից, հրապարակ է հանել մարդիկ ու ծրագիրներ, ուրուագծել է մի բանի ձեռնարկներ այս ու այն մայրաքաղաքում և յոյս ունի (ունի՞ արդեօք), որ հայոց ուէֆօրմները պիտի իջնեն մանանայի պէս դիւանագիտական երկնքից:

Դիւրին բան... գործելու աժանագին ծանապարհ, որ չի բնաւ հարւածում գրպանին, չի պահանջում առանձին զոհողութիւն. բայց փորձեցէք խօսելու այդ ազգասէր պարոններին, այդ հարուստ, պերճանքի մէջ խեղդող գաղութներին՝ երկրի, ժողովրդի ամենահրատապ ցաւերի մասին, փորձեցէք հասկացնելու այդ անզգայ, մամոնապաշտ հոգիներին, որ ժողովուրդը կարօտ է ինքնապաշտպանութեան միջոցների, որ առանց դրան՝ բոլոր ազգաշէն ծրագիրները աւազի վրայ կառուցւածքներ են... Ապարդիւն: Գորբաթիւ, անհատական բացառութիւններով, հայ ունեւոր դասակարգը, ազգի պաշտպան, խնամակալ դասակարգը, նոյն քարացած և եսապաշտ գոյութիւնն է, ինչ որ նախնի օրերում. Ոչ մի նշան միութարական, գրեթէ ոչ մի յառաջդիմութիւն 1878-ի օրերից ի վեր...

Մենք չենք, որ պիտի ժխտենք յդիւանագիտական միջոցների՝ օգտակարութիւնն ու այժմէութիւնը. նրանք ոչ միայն օգտակար են, այլ և անհրաժեշտ:

Անհրաժեշտ են, բայց բաւական չեն. նրանք չեն տալիս պատասխանը մեծ, ահաւոր հարցումի. Ի՞նչ կը լինի հայ ժողովրդի վիճակը ՎԱՂԱ երբ այդ բոլոր դիւանագիտական ձեռնարկները կը վիժին, խաղաղ լուծման երանքները կը խորտակին և դժբախտ հայաստանցին կը մնայ նորէն մատնւած արիւնաբոս հրոսակներին ու անխիղճ հայաջինջ պաշտօնէութեան...

Ի՞նչ կը լինի այդ ժողովրդի վիճակը, եթէ առաջիկայ գարնան, ընդհանուր վերիվայրումի ահեղագոյն վայրկեանին, մարդասպան խաժամութեւ, ձգտւելով տիրապե-

տող քառույթի, կենտրոնական կառավարութեան թուլութիւնից, անէացումից, կամ թէ նոյնիսկ այդ կառավարութեան աջակցութեամբ, խրախուսանքով՝ փորձէ վերստին յագուրդ տալ վրէժխնդրութեան ու աւերածի իր վայրագ բնագոյններին...

Ի՞նչ... *That is the question!* Այդ է ֆատալ, չարագուշակ, սարսափելի խնդիրը, բոլոր խնդիրների խնդիրը։ Այդտեղ է, որ չարաչար կաղում է մեր ազգային համերաշխութիւնը, մեր կամքերի ու ջանքերի անհրաժեշտ ներդաշնակութիւնը։ Այդտեղ է, որ հայ մարտիկը, կոտորուող ժողովրդի թե ու թիկունք ֆէդային, ողբում է իր ցեղակից և ունեւոր դասակարգերի անիծակոռ ուռտիւնը, նրանց դաժան անտարբերութիւնը և քաղաքական *sens*-ի լիակատար բացակայութիւնը...

* *

Պրօպագանդը Եւրոպայում ցանկալի է, դիմումները, ծրագիրներն ու օրգաններն անհրաժեշտ—և իւրաքանչիւր հայ անհատ ու խմբում պարտաւոր է իր բաժին աջակցութիւնը բերելու գործի գլուխ կանգնած, ղեկավարող անհատներին ու օրգաններին։ Սակայն... նախ և առաջ՝ ներքին է ցանկալի, որ կաթողիկոսական պատգամաւորութիւնը կանգնած մեայ իր կոչման բարձրութեան վրայ, որ նա խնդրի լիակատար ծանօթութեամբ և ինքնուրոյն, հաւաքաբար առաջ տանէ իր փափուկ, պատասխանատու պաշտօնը, ներկայացնէ Եւրոպական արեօպագին հայ ժողովրդի իրական պահանջները, ներքին է, մանաւանդ, ցանկալի, որ Գուռը իր հայազգի արբանեակներով չփորձէ իր ապականող ազդեցութիւնը տարածել հայկական պատգամաւորութեան և նրա անելիք բայլերի վրայ...

Այդ ևս կացութեան վաւանգներից միին է. նուրիներն ու Արթիւները անպակաս են Բ. Գրան մթնոլորտում։ ամեն անգամ, երբ օսմանեան կառավարութիւնը յղացել է հակահայ ծրագիրներ կամ փորձել է ի դերը հանելու այս կամ այն հայանպաստ ծրագիրը, թող փչելու Եւրոպայի աչքերին իր ուրոյն «ռէֆորմային ծրագիրներով», իր «ընդարձակ բարենորոգման» հաւաստիքներով—գրեթէ միշտ նա ունեցել է իր տրամադրութեան տակ՝ սիրայօժար, հաւատարիմ հայ ծառաներ, որոնց և հրապարակ է նետել նեղն ընկած պարագային։ Երեկ արդէն մենք տեսանք այդ ծառաների թափառումը սաղրազամի կաթիլներում, ուր նրանք կանչւել էին—ո՛ւմ արդեօք յանձնարարութեամբ — իրենց «հեղինակաւոր» կտրծիքները յայտնելու Հայաստանի բարեկարգութեան մասին։

Բայց ամենէն ազդեցիկը և թերևս ամենէն վստահելին այդ հայաստիկ ծառաներից՝ գտնւում է նոյնիսկ կառավարութեան մէջ, վարում է արտաքին գործոց նախարարի պաշտօնը. նրա հետ է, որ քեամիլը խորհրդակցում է Հայաստանի վիճակի մասին, նրա ձեռքն

է, որ պիտի տրւի և վաղան ու ֆօրմների ծրագիրը։

Այդ մարդը — որի խիղճը նոյնքան առաձգական է, որքան իր մտաւոր կարողութիւնները սահմանափակ — դառնում է հետզհետէ մի անախորժ բռն հայութեան խղճմանքի վրայ։ Նա բնաւ տաղտուկ ու անպատեհութիւն չզգաց, ըստ երևոյթին, իր մինիստրական դերի մէջ, անգամ վերջին տագնապալի ամիսներում, երբ ամեն օր սուրհանդակը բերում էր Հայաստանից քրդական նախճիրների արիւնոտ մանրամասներ և կառավարական մեղակցութեան բացայայտ ապացոյցներ։ Նա եկել էր դիւանագիտական իր մեծահռչակ կարողութիւններով փրկելու Ցաճկաստանը (Եւրոպական Թիւրքիան կորցնելուց յետոյ՝ այժմ, անշուշտ, պիտի ջանայ պահելու ասիականը), բայց ամենից առաջ փրկել կուզէ իր սեփական պաշտօնը, որին նա կառչել է յամառաբար, ինչպէս գոհնիկ մակարոյժը կենդանական օրգանիզմին... Դիւանագետի լուսապսակը չքացաւ և նրա տակ Եւրոպական հասարակութիւնը տեսաւ միայն արեւելցի մի փոքրիկ *chicaneur*—*plus ture que le ture*—որ անընդհատ պրօփօսիօններով ու վրիպումներով գրգռեց յոյնին, սերբին, բուլգարին և ի վերջոյ զգուշեց յարուցեց անգամ իր նախկին երկրպագուների շարքերում։ Իր ձախողակ կարիերի մէջ՝ Նորատունկեան էֆէնտին պիտի կամենայ, անտարակոյս, նաև «ազգի փրկիչ» լինել, տարածել իր ազդեցութիւնը անգամ դրսի գործիչների վրայ, լուծել տալ հայոց հարցը, ինչպէս իրեն է հաճելի և իր տիրոջ—Քեամիլին։

Առաջին փորձն եղաւ այդպիսի լուծման—և վրիպեց։ Ամբողջ հայութիւնը իր ցասկոտ արհամարհանքը միայն յայտնեց օսմանեան դահլիճի բարենորոգչական խաբէութիւններին։ Նոյն վիճակին կ'արժանանան բոլոր նման փորձերը։ Բաւական է, որքան ազգը տառապել է անցեալի մէջ արիւնակից ստրկամիտ, շահախնդիր պաշտօնեաներից։ Մենք չենք թոյլ տայ, որ նրանք նորէն հրապարակ գան իրենց յոռի ազդեցութիւններով։ Եթէ հայկական խնդիրը այս անգամ էլ պիտի թաղւի, ապա գէթ խոյս պիտի տանք հայ տարրը այդ թաղմանը մասնակից անելու աղէտաւոր հեռապատկերից...

* *

Անկախ, շիտակ և աշալուրջ գործունէութիւն, առանց ենթարկւելու վաւանգաւոր ներշնչումների — այսպէս է լինելու Եւրոպայի հայկական պատգամաւորութեան բնոյթը և ընթացքը։

Եւրոպական այդ անհրաժեշտ աշխատանքի հետ զուգընթաց պէտք է երթայ երկրի ներքին աշխատանքը, որ պէտք է օրինական միջոցներով ապահովէ հայ գիւղացու կիանքն ու պատիւը, բարձրացնէ ժողովրդի դիմագրական կարողութիւնը՝ հանդէպ քրդական յարածուն սպառնալիքներին։ Հեռու մնանք պատրանքներից,

չափազանցած ու վարդապոյն յոյսերից, խաբէական ծանուցումներով չյուսադրենք ժողովրդին, չըլատենք նրա փրկարար ինքնագնութիւնը ստախօս հեռագիրներով՝ թէ իբր արդէն խնդիրը լուծման ճամբու վրայ է, թէ այս ինչ կամ այն ինչ պետութիւնը խոստացել է պաշտօնապէս յարուցանել այն՝ դեսպանական ժողովի մէջ... Յարաբախաւարար, չկայ դեռ այդ որոշումը և ոչ մէկ պետութեան կողմից, ամեն ինչ տակաւին անորոշութիւն է և պատրանք, որից գուցէ ապագայում կը ժայթքի ուրախառիթ ու կազդուրիչ իրականութիւնը... Առ այժմ խօսքը դեռ քրդին է, որ ռուսական սահմաններից մինչև Շատախ ու Սասուն ճոճում է իր մարդաջինջ դաշոյնը, բաւբաւում է նոյնիսկ — ինչ որ խորհրդաւոր թելադրութեամբ, արտաքին ներշնչւումով — «ավտօնով, ինքնավար ֆերդինանտներ» մասին և ցոյց տալիս բռնունջքը իր հարեան «Ֆլա»-ին... Վերջին մի շարք դիմադրական փորձերը հայերի կողմից — մի քանիսը հերոսական և ջախջախիչ — աւելի ևս մտածել են տալիս այդ բարբարոս հօրդաներին, որոնք քաջ են միայն անզէն ու անպաշտպան զոհերի հանդէպ...

Այս ծանր օրերի մէջ ազգի բոլոր տարրերը — իրական, գործօն համերաշխութեամբ — պէտք է որ համախմբւէին մարտական կազմակերպութեան շուրջը, աճեցնէին նրա վարկն ու հմայքը և նրա հետ միասին սիրտ ապին յուսակուոր ժողովրդին, ներշնչէին վստահութիւն ու կորով... Այդպէս է լինում շատ թէ քիչ ինքնաձանաչ, բաղաբակիր ժամայնքների մէջ Մեզ մօտ — հակառակն է Բարոզելով հանդերձ համերաշխ գործակցութիւն խաղաղ, անփաս ձեռնարկների ու ցոյցերի մէջ — մի կարգ մարդիկ շարունակում են իրենց քինոտ արշաւանքը կազմակերպութեան դէմ և նոյնիսկ... ցնծութեան ծափ են զարկում ինքնապաշտպանութեան այս կամ այն ծրագրի վիժման առիթով... Ուրիշները խնամքով ու եռանդով նկարագրում են երկրի մէջ կատարուող դիմադրական ճիգերը, մատնում են ռուսահայ անհատներին կառավարական ու շարքութեան, ներկայացնում են ինքնապաշտպան խմբերի առաջնորդներին, որպէս մի-մի Լանկ-Թամուրներ, որ նպատակ ունին կոտորելու, կործանելու ժողովուրդը... Կարգացէք այն անլուր աղտեղութիւնները, որ հրատարակել էր վերջերս Ամերիկայի մի անպատիւ հայ օրգան... Դաւաճանի և մասնիչի ոճրանիւթ ուղեղը չէր կարող — ներկայ փափուկ, պատասխանատու օրերում — աւելի զազիր շահատակութիւններ յղանալ... Սարսափելի է, որ այդ տեսակ գարշաւներ տպագրւում են և արտատպւում, շրջան անում մի յայտնի մամուլի մէջ։ Աւելի ևս սարսափելի է, որ տպագրւելուց յետոյ՝ նրանք չեն յարուցանում զգուշի ու ցասման փոթորիկ...

Թ Ի Ի Ր Ք Ի Ա

Ռ Ե Ֆ Օ Ր Մ Ն Ե Ր Ի Ծ Ր Ա Գ Ի Ր

ՕՍՄԱՆԵԱՆ ՀԱՅԱՍՏԱՆԻ ԲԱՐԵՆՈՐՈՂՄԱՆՑ ՆԱԶԱԳՈՅՆ ԾՐԱԿԻՐ, ՆԵՐԿԱՅԱՑԻԱԾ 1901 ՍԵՊՏ. 13-ԻՆ ՖՐԱՆՍԱՅԻ ԱՐՏԱՔԻՆ ԳՈՐԾՈՑ ՆԱԽԱՐԱՐ Պ. ԴԷԼԿԱՍԷԻ՝ ՁԵՌԱՄԲ Պ. ՊԵՏՌՔԻՍՈՒ, ՅԱՆՈՒՆ Հ. Յ. ԴԱՇՆԱԿՑՈՒԹԵԱՆ.

1) Նւազեցում վիլայէթներու թւին (վերահաստատում հին սահմաններուն)։

Տես. — 11 մայիս 1895-ի Յիշատակագիրը *):

2) Եւրոպական չէզոք ազդութեան մը պատկանող ընդհանուր կառավարիչ մը պիտի հաստատուի հինգ տարւան ժամանակամիջոցի մը համար, հաւանութեամբ մեծ պետութեանց։ Այս ընդհանուր կառավարիչը պիտի վախճէ գործադիր իշխանութեան բոլոր իրաւասութիւնները։ Պիտի հսկէ հանրային ապահովութեան ու կարգին պահպանման Պիտի գանձէ հարկերը, իր պատասխանատուութեան տակ պիտի նշանակէ վարչային պաշտօնեաները։ Պիտի հաստատէ դատաւորները և գործադրել տայ անոնց վճիռները։ Առանձնապէս հոգ պիտի տանի խաղաղ աշխատանքին զարգացման և ճարտարաւեստին և հողագործութեան կատարելագործման։ Ընդհանր կառավարիչը կարող է պաշտօնանկ ըլլալ պետութեանց համաձայնութեամբ միայն։ Իր բնակավայրը պիտի ըլլայ հայկական նահանգներու կարեւոր կեդրոններէն մէկը։

Տես. — Կազմակերպական կանոնագիր Լիբանանի,

*) Մայիսեան յիշատակագիրը հետեւեալ կերպով կ'արտայայտուի այս մասին. — Տրւած ըլլալով, որ բարենորոգումները պիտի գործադրեն Էրզրումի, Պիլիսի, Վանի, Սիւպի, Մամուրէթի, Երզնկի և Տիարպէթի վեց վիլայէթներուն մէջ, պէտք է քննել այս նահանգներու թւին նւազեցման խնդիրը։ Նոր բաժանում մը թայլ տալով որոշ խնայողութիւն ձեռք բերել վարչական ընդհանուր ծախքերուն մէջ թերեւս դիւրացնէր վալիներու ընտրութիւնը պակսեցնելով անոնց թիւը և ուժեղացնէր անոնց հեղինակութիւնը բարեւաւելով անոնց նիւթական կացութիւնը։ Այս նոր բաժանումը պէտք է կատարուի այնպիսի ձևով մը, որ ժողովուրդները իւրաքանչիւր նահանգի վարչային պանապան միութեանց մէջ բաժանւած ըլլան ազգազրական տեսակէտով հարաւոր եղածին չափ միատարր համախմբումներու։

ՄԱՆՈՒ. — 1885-էն առաջ 10 սարի էրզրումի էյալէքը կը պարունակէր Ձրէքի, Վարսայ եւ Էրզրումի (այժմու վիլայէթը) Երզնկէն, ինչպէս նաեւ Վանը իր մէջ ունենալով Հէֆեսի, Պիլիսի եւ Մուսը։ Այս էյալէքը յետոյ բաժանուեցաւ 5 վիլայէթներու։ 1877-ի պատերազմէն ետք այս հողաբաժնին թիւրքի մնացած մասը բաժնուեցաւ 4 վիլայէթներու. — Էրզրում, Վան, Հէֆեսի, Մուս։ Անկից յետոյ Հէֆեսի Երզնկէն միացուեցաւ Վանայ վիլայէթին, իսկ Մուս Երզնկէն Պիլիսի վիլայէթին, որ նոր ստեղծուեցաւ։ Աւելի ետք մամուրէթի վիլայէթի սահմանը միացմամբ մէկ րանի յարակից հողամասերուն, զարձաւ վիլայէթ մը, իսկ Տիարպէթի վիլայէթը եղաւ անոր մէկ սահմանը։

կազմակերպական կանոնագիր Բուժկի, Դեղին դիրք (Հայկական դործեր) 1897 թիւ 48, 49, 51, 52, 53, 55, Յիշատակագիր 11 մայիս 1895-ի:

3) Ընդհանուր կառավարիչին բով պիտի հաստատուի ընդհանուր ժողով մը, ընտրւած հետեւեալ կերպով. — Իւրաքանչիւր գաղա (գաւառակ) պիտի ուղարկէ մէկ իսլամ մէկ բրիտանեայ երկու պատգամաւոր սանճագին (գաւառ) գլխաւոր քաղաքը, ուր պիտի ընտրւին երկու խորհրդականներ մէկը իսլամ միւսը բրիտանեայ: Ընդհանուր ժողովը պիտի գումարէ տարին տեղամ մը. իր գործը պիտի ըլլայ քննել հանրային օգտակարութիւն ներկայացնող աշխատանքներու վերաբերեալ խնդիրները, ինչպէս հաղորդակցութեան միջոցներու զարգացում, վարկային սնտուկներու կազմութիւն և այն ամենը, որ կրնայ ծառայել նպաստելու հանրային կրթութեան, հողագործութեան, վաճառականութեան և ճարտարարւեստին: Ընդհանուր ժողովը պիտի բաժանէ նաև հարկերը և հակաշնչէ (controle) հասոյթներու և ծախսերու յանձնաձումը: Իր մէջէն պիտի կազմէ միայուն խորհուրդ մը օժանդակելու համար ընդհ. կառավարչին՝ ժողովին չգումարած առեւտրերը:

Անց վիլայէթներու պիւտքէն պիտի կազմէ հինգ արւան ժամանակամիջոցի մը համար, հասոյթներու միջինին հիման վրայ ընդհ. ժողովին կողմէ, համաձայնութեամբ ընդհ. կառավարչին: Եկամուտները պիտի յատկացին նախ տեղական պէտքերու գոհացման և աւելացածը պիտի ղրկէի կեդրոնական կառավարութեան:

Տես. — Կազմակերպական կանոնագիր Լիւթանի, Կազմակերպական կանոնագիր 1868-ի Կրէտէ կղզին, Կազմակերպական կանոնագիր Արեւելեան Բուժկի, Յիշատակագիր 11 մայիս 1895-ի:

4) Վալիները, մուլէսարիքները, գայմագամները և ին իրրէ օժանդակ պիտի ունենան վարչական խորհուրդներ, ընտրւած ժողովուրդէն:

Տես. — Յիշատակագիր 11 մայիս 1895-ի:

5) Եւրոպական միայուն յանձնաժողով մը պիտի հիմնէի պետութեանց կողմէ բարենորոգումները հաստատելու և տնոնց գործադրութեանն հսկելու համար: Այս յանձնաժողովը գեսպաններուն միջոցաւ պիտի ծառայէ իրրէ միջնորդ մէկ կողմէն ժողովուրդին ու տեղական վարչութեան, միւս կողմէ այս վերջինին և կայսերական կառավարութեան միջև:

Տես. — Դեպքանաժողովներ Պոլսոյ և Ֆիլիպէի, Յիշատակագիր 11 մայիս 1895-ի:

6) Ն. Վ. Սուլթանը ընդհանուր ամբողջական ներում պիտի շնորհէ քաղաքական գործերու համար դատապարտւած կամ ամբաստանւած հայերուն:

7) Բոլոր հայերը ինչ կրօնի ալ որ պատկանին, որ առանց դատավարութեան արքորւած էին, ըլլայ օսմանուն կայսրութեան հողերէն դուրս, ըլլայ իրենց բնակած նահանգներէն դուրս և կամ որ դէպքերու երկրէն կամ թշուառութենէ մղւած պարտաւորւած էին

արտասահման գաղթել, պիտի կրնան ազատօրէն վերագառնալ Թիւրքիա կամ այն նահանգները, ուսկից ելած էին, առանց անհանգստութիւններու ենթարկելու տեղական իշխանութեանց կողմէ և վերստին պիտի տիրանան մեկնելէ առաջ իրենց ունեցած ստացւածքներուն:

Տես. — Յիշատակագիր 11 մայիս 1895-ի:

8) Այն հայերը, որոնք ֆեաւած են ըլլայ իրենց անձի, ըլլայ ստացւածքի տեսակէտով, պիտի ստանան պատշաճ հատուցում և բաւականութիւն:

Տես. — Յիշատակագիր 11 մայիս 1895-ի:

9) Բոլոր յետեւեալ տուրքերը պիտի քննեն: 10 տարի տուրքերը պիտի յատկացին միայն տեղական պէտքերու:

Տես. — Կարգադրութիւն Զէյթունի գործին, Դեղին դիրք, թիւ 94:

10) Բ. Դուռը պիտի հսկէ, որպէս զի կրօնափոխութիւնները առարկայ ըլլան 1856-ի խաւար Հիւսայունով (յօդ. 10, 11, 12) հաստատւած սկզբունքներէ բղխող երաշխաւորութեանց, որոնք գործնականին մէջ յաճախ անտես են առնւած: Կրօնափոխ ըլլալ ցանկացող անձնաւորութիւնները պէտք է ըլլան չափահաս և իրենց կրօնի փոփոխութեան յայտարարութիւնը ընելու պիտի արտօնեն շաբաթւան մը պայմանաժամէ յետոյ, որու միջոցին պիտի ենթարկին իրենց կրօնական պետին հսկողութեան:

Տես. — Յիշատակագիր 11 մայիս 1895-ի:

11) Բ. Դուռը յատուկ հրահանգներ պիտի տայ իշխանութեանց, որպէս զի չլրկնէին ոտնձգութիւններ հայ կղերին և հասարակութեան այն իրաւունքներուն ու առանձնաշնորհումներուն դէմ, որոնք կը բղխին 1863-ի սահմանադրութենէն (կազմակերպական օրէնք հայոց) և սուլթաններէն պարգեւած պէրութներով:

Տես. — Յիշատակագիր 11 մայիս 1895-ի:

12) Ասիական Թիւրքիոյ միւս այն վիլայէթներուն մէջ, ուր որոշ սանջակներու հայ ժողովուրդը ընդհանուր բնակչութեան կարեւոր մէկ մասը կը կազմէ, վալի կողքին պիտի նշանակուի մասնաւոր բրիտանեայ պաշտօնեայ մը հայոց շահերով զբաղելու համար: Այս պաշտօնեան պիտի ընդունի հայ ժողովուրդին աղերսները և զանոնք պիտի հաղորդէ վալիին, որ համաձայնութեամբ նոյն պաշտօնեային պիտի տայ այդ աղերսներուն պէտք եղած հետեւները:

Բացի այդ՝ այս պաշտօնեան կանոնաւորաբար տեղեկագրեր պիտի ուղղէ Պոլսոյ հակակշռող միայուն յանձնաժողովին: Այս վիլայէթներուն մէջ, ուր որոշ տեղեր հայերը բնակչութեան մեծամասնութիւնը կը կազմեն, վարչային արդի բաժանումը պիտի փոփոխուի և նահիէներու (գիւղախումբ) կազմութեան վերաբերեալ բարենորոգութեանց ծրագրին տրամադրութիւնները պիտի գործադրեն այդպիսով իրրէ առանձին վարչական միութիւններ ընդունւած տեղերուն մէջ:

Տես. — Յիշատակագիր 11 մայիս 1895-ի:

13) Ներքին կարգը պիտի պահպանեն ոստիկանութիւնը ոստիկան զինւորութիւնը (*gendarmérie*) և տեղական բաղաբապահ զինւորութիւնը (*militice*), առանց ցեղի ու կրօնի խտրութեան, կազմակերպւած եւրոպացի սպաներէ և անոնց հրամանատարութեան տակ:

Տես. — Կազմակերպական կանոնադիր Լիբանանի, Կազմակերպական կանոնադիր Արեւելեան Բուսնի, Պերլինի դաշնագիր յօդ. 15:

14) Զէնք կրելու մասին խստորէն միակերպ կանոնադիր մը ի գործ պիտի դրւի ամբողջ ժողովրդին համար, առանց ցեղի և կրօնի խտրութեան:

Զինւորական տուրքը (պետէլը ասկէրի) պիտի ջնջւի ոչ-խալաքներուն համար. բաղաբապահ զինւորութեան մէջ ծառայութիւնը պարտաւորիչ պիտի ըլլայ բոլոր տեղացիներուն համար:

15) Համիդիէ զօրքը պիտի արձակւի և բերդերը միւս օսմանեան հպատակներուն պէս պարտաւոր պիտի ըլլան կատարելու կանոնաւոր զինւորական ծառայութիւն:

Տես. — Յիշատակագիր 11 մայիս 1895-ի:

16) Դատական բարենորոգումներ 11 մայիսի բարենորոգութեանց ծրագրին մէջ ցոյց տրւած սկզբունքներուն համեմատ *):

17) Ազատութիւն հաւաքումներու, հանրային կըրթութեան և մամուլի:

*) 11 մայիսի բարենորոգմանց ծրագրին արդարութեան վերաբերեալ մասը, որ կը կազմէ նոյն ծրագրին 37-րդ զեւեռը, կը բաղկանայ հետեւեալ յօդւածներէն. —

Յօդ. 29. — Նահիյէի (գիւղական) իւրաքանչիւր տեղւոյն մէջ գոյութիւն պիտի ունենայ ծերերու խորհուրդ մը մուխտարին նախագահութեան տակ, որուն պաշտօնը պիտի ըլլայ նոյն տեղւոյն բնակիչներուն միջև ծագած վեճերը կարգադրել բարեկամօրէն:

Յօդ. 30. — Իւրաքանչիւր գաղայի (գաւառակ) մէջ գոյութիւն պիտի ունենայ համեմատօրէն նահիյէներու թւին բաւականաչափ թւով հաշտարար դատաւորներ (*juges de paix*), նշանակւած դատական նախարարին կողմէ, համաձայն վալիին ցուցմունքին: Այդ հաշտարար դատաւորներէն մէկը անպատճառ պիտի բնակի գաղային գլխաւոր քաղաքին մէջ: Գաղայի մը հաշտարար դատաւորներու մէկ երրորդը քրիստոնեայ պիտի ըլլայ: Քրիստոնեայ հաշտարար դատաւորները պիտի հաստատուին այն կեդրոններուն մէջ, ուր քրիստոնեայ ազգաբնակչութիւնը մեծագոյն թիւը կը կազմէ:

Յօդ. 31. — Հաշտարար դատաւորը պիտի զբաղի ա) Պատժական խնդիրներու մէջ առանց վերաքննութեան այն օրինազանցութիւններով (*contravention*), որոնք ենթակայ են հասարակ ոստիկանական պատիժներու և վերաքննութեան պարագային այն յանցանքներով (*délit*), որոնք ենթակայ են ամենաշատը 500 զրուշ տուգանքի և 3 ամսեայ բանտարկութեան. բ) Քաղաքային խնդիրներու մէջ առանց վերաքննութեան մինչև 1000 զրուշնոց անհատական, քաղաքային և առևտրական դատերով, իսկ վերաքննութեան պարագային մինչև 5000 զրուշնոց նոյնօրինակ դատերով:

Յօդ. 32. — Հաշտարար դատաւորը պիտի կայացնէ նաև

հաշտութեան դատարան: Պիտի կրնայ, վիճող կողմերու խնդրանքին վրայ իրաւարարներ (*arbitre*) նշանակել կարգադրելու համար այնպիսի վեճերը, որոնց առարկան 5000 զրուշէն աւելի է: Իրաւարարական վճիռի մը արձակելու պարագային, վիճող կողմերը պիտի հրաժարին վերաքննութենէ:

Յօդ. 33. — Տրւած ըլլալով, որ հաշտարար դատաւորները գաղաներուն մէջ դատարանի տեղ կը բռնեն իրենց որոշումներու վերաքննութիւնը, քաղաքային խնդիրներու մէջ տեղի պիտի ունենայ սանձագին դատարանին առջև:

Յօդ. 34. — Հաշտարար դատաւորներուն կողմէ ըստ իրենց իրաւասութեան արտասանւած բանտարկութեան դատապարտութիւնները պիտի գործադրեն գաղային բանտին մէջ: Մուտիւնները հաշտարար դատաւորներուն պիտի օժանդակեն թէ քաղաքային թէ պատժական վճիռներու գործադրութեան մէջ:

Յօդ. 35. — Գաղայի դատարանները ջնջւած ըլլալով, սանձագի դատարանները պիտի զբաղին 5000 զրուշէ աւելի գումարներու վերաբերող քաղաքային գործերով և քաղաքային խնդիրներու մասին հաշտարար դատաւորներու որոշումներու վերաքննութեամբ: Սանձագի դատարանները պիտի ունենան միմիայն քաղաքային տառան (*chambre civile*), իսկ պատժական տառանին տեղ գոյութիւն պիտի ունենան շրջան ոճրագատ տառանները (*cour d'assises*): Սանձագի դատարանները պիտի կազմին նախագահ մը, որ պիտի ըլլայ վկա, եալ դատաւոր մը, նշանակւած դատական նախարարին կողմէ և երկու անդամներէ, որոնք պիտի ընտրուին վալիին կողմէ սանձագներու խորհուրդներուն պատրաստած ցանկին վրայէն:

Յօդ. 36. — Այսպէս սանձագներու դատարաններուն պատժական ճիւղերուն տեղ պիտի հաստատուին շրջան ոճրագատ տառանները: Ասոնք պիտի ունենան նախագահ դատաւոր մը վիլայէթին բարձրագոյն տառանին անդամներէն առնւած և անոր պիտի միացան երկու անդամներ, մէկը իսլամ մէկը քրիստոնեայ, նշանակւած վերաքննիչ տառանին կողմէ սանձագին հաշտարար դատաւորներուն մէջէն: Այս հաշտարար դատաւորները մասնաւոր հատուցում մը պիտի ստանան ոճրագատ տառանի շրջանի միջոցին:

Յօդ. 37. — Ոճրագատ տառանը նիստ պիտի գումարէ կարգաւ այն բոլոր գաղաներու մէջ ընդ որո և վիլայէթին գլխաւոր քաղաքը և սանձագներու գլխաւոր քաղաքները, ուր իր ներկայութիւնը անհրաժեշտ կը նկատուի: Այս տառանը պիտի զբաղի վերաքննելով հաշտարար դատաւորներու որոշումները յանցանքներու մասին, իսկ առանց վերաքննութեան այն ոճիւրներով ու յանցանքներով, որոնք ենթակայ են 5000 զրուշէ աւելի տուգանքի և 8 ամսէ աւելի բանտարկութեան:

Ոճրական խնդիրներու մէջ ոճրագատ տառանի կողմէ արւած վճիռները կրնան ենթարկուիլ միայն վճարեկ տառանին:

Յօդ. 38. — Ոճրագատ տառանի նախագահը գաղան հասնելով պիտի պահանջէ հարցաքննիչ դատաւորէն մէկ ցանկի տեղեւած այն դատերուն, որոնք կրնան անմիջապէս ներկայացուի իրեն և ցանկ մըն ալ այն դատերուն, որոնք տեղեւելու վրայ են: Եթէ այս վերջիններու մասին հաստատէ որեւէ անկանոնութիւն կամ անարդարանալի ուշացումներ, անմիջապէս տեղեկագիր մը պիտի ուղղէ դատական նախարարութեան:

Ոճրադատ տառանի անգամները դադարեցին և անկից մեկնած ժամանակ, պիտի այցելեն բանտերը, պիտի տեղեկանան բանտարկեալներու կացութեան և արձանագրութեան տեսքերը պիտի ստուգեն:

Յօդ. 39.—Վերայեթի բարձրագոյն տառանը պիտի բաղկանայ նախագահ և քանի մը և բաւականաչափ թւով տառաններէ, զբաղելու համար ներկայացած քաղաքային գործերով և հայթայթելու համար նախագահներ շրջուն ոճրադատ տառաններուն: Այս բարձրագոյն տառանը պիտի պաշտօնավարէ քաղաքային խնդիրներու մէջ իբրեւ վերաքննիչ տառան, իսկ պատժական խնդիրներու մէջ, իբրեւ ոճրադատ տառան: Իր կազմութիւնը օրինաւոր է, երբ ներկայ են նախագահը և երկու անգամներ: Բացի այդ, այս տառանը կը պարունակէ նաեւ ընդհանուր դատախազ մը և բաւականաչափ թւով փոխանորդներ:

Յօդ. 40.—Հաշտարար դատաւորներու սրտշմեկները, ինչպէս նաեւ ամեն կարգի դատարաններու վճիռները պիտի գրեն թիւքերէն լեզուով: Թիւքերէն բնագրին, ըստ տեղւոյն և դատի մէջ եղող կողմերուն, պիտի կցւի անոր հայերէն լեզուով մէկ թարգմանութիւնը:

Ա Ն Խ Ո Ւ Ս Ա Փ Ե Լ Ի Ն

Բաւական ժամանակից ի վեր՝ ամենօրեայ միմեանց յաջորդող դէպքերը, կարելի է ասել, մի առանձին նորութիւն չէին բերում, —նրանք գրեթէ նորմալ կերպով շարայարող մի շղթայի օղակներն էին:

Պարլամենտի ցրումից ու ընտրութիւններից յետոյ Իթթիհատի մենատիրութենէն և այդ մենատիրութիւնը ապահովելու համար միջոցների մէջ խտրութիւն չգնող մտայնութիւնէն ուրիշ բան չէր սպասէր: Ուստի և այդ շղթայի ամեն մի օղակով առանձնապէս զբաղւելով, մի նոր միտք արտայայտած չպիտի լինէինք:

Ընտրութիւններից շատ առաջ, Գաշնակցութեան Իթթիհատին մօտ բարեկամ համարած ժամանակներումն էլ, իմ հրապարակ դրած և միշտ տրամաբանօրէն անխախտ պահած կտրծիքը այս էր.

— Հաստատելով և ուժգնօրէն բնագրատելով հանդերձ Իթթիհատի ձախող քաղաքականութիւնը կամ աշխարհափարումը, առիցօրէ կազմակերպւած լաւագոյն տարրի, նրա հեծեմօնին ընդունել իմ միշտ, իբրեւ անխուսափելի, գերադասելի ու տանելի չարիք, գէթ իրաց դրութիւնը պահելու, աւելի աղէտաբեր ռէաքսիօնի տեղի չտալու համար, մինչև որ լաւագոյն տարրերը կազմակերպւին և հակադիր կամ փոխարինող ուժ կազմեն:

Ես չափազանց սկեպտիկ եմ եղել Երկրի ճակատագիրը կարենալ վարելու, փրկելու քաղաքական-ընկերային կազմակերպւած ուժ հրապարակ գալու վերաբերմամբ:

Թիւքերի մէջ ամենից շատ են զբաղւում նոյնիսկ

մասսաները քաղաքականութիւնով, բայց հիմնական համոզում, համոզմունքի պաշտպանութեան ջիղ, քաղաքացիական արիութիւն և զոհաբերութիւն բացակայում է:

Տիրող տարրերի մէջ ո՛չ մի կուսակցութիւն ուժ և հեղինակութիւն չի՝ ներկայացնի՝ եթէ բանակը յենարան չունի, որովհետեւ քիչ ու շատ քաղաքացիական ջիղն ու առաքինութիւնը, յեղափոխական իսկական՝ բայց չզարգացած ոգին զինւորական տարրի մէջ է ենթադրւում:

Իսկ մինչև որ այդ ոգին, այդ ջիղը, ուժը կամ հեղինակութիւնը բանակից տիրող տարրերի ոչ-զինւորական խաւերում չտարածւի, իրական բարեշրջումի կամ յեղաշրջումի հաւատք ընծայել անբնական է:

Ասել ու կրկնել եմ, որ 1908 յուլիսի 10-ը Յեղափոխութեան հետեանք չէր՝ այլ Բանակի մի մասի սպանալիքին, պետական հարւածին:

Մարտի 31-ից յետոյ Համիդի անկումն էլ Ազատարար Բանակի գործը եղաւ և ո՛չ քաղաքացիների, Յեղափոխական կազմակերպութիւնների:

Իթթիհատը խելքի բերողն էլ Բանակը պիտի լինէր և ո՛չ ընդդիմադիր տարրերը — խօսքը տիրապետողների համար է:

Բայց Իթթիհատը և հետեալար նրա նեցուկ Բանակի մասը իշխանութեան գլուխ լինելով, երևոյթները չէին յուսադրի, որ այդ նեցուկը հեշտութեամբ հրաժարւի իր վայելած առաւելութիւններից և լքի իր պաշտպանաւը:

Դէպքերը հակառակն ապացուցին:

Առաջ էր եկել «Զինւորական Ազատարար Լիգը»:

Թէ ի՞նչ ուժ ու համեմատութիւն էր ներկայացնում այդ Լիգը, զինւորականութեան ո՞ր խաւերում էր տարածւած, այդ մնացել է խորհրդաւոր, բայց թուում էր, որ գէթ իր մեծամասնութեամբը Իթթիհատեան շնորհներից շատ չվայելող, դժգոհներիցն է:

Անկասկած որ դրանց շարքումը մաս և ողորդութիւն ունէին Ալբանական արիւնն ու ազգային ոգին:

Բայց հէնց որ Բանակի մէջ այդ շարժումը ուշադրութիւն գրաւելու, ազդելու աստիճանին հասաւ, Իթթիհատը միամտութիւն ունեցաւ Բանակը քաղաքականութիւնից հեռու պահելու ստիպող օրէնսդրական զսպող միջոցին դիմելու՝ թէև միևնոյն ժամանակ խաբուսիկ զիջումներ էլ գործ գնելով, ինչպէս Մահմուդ Հէվէթ փաշայի հոստաբուրմը:

Իթթիհատի անսկզբունք տակտիկան է՝ ինք իր մէջ ամեն կոմպրոմիս ընդունել՝ միայն թէ իր մենատիրութիւնը չխանգարւի, ինչպէս այդ արեց Սատրգ բէգեան հերձաւորի, անցեալ տարւոյ Սալոնիկեան կոնգրէի ժամանակ:

Բանակը քաղաքականութիւնից հեռու պահելու օրէնքը ուրիշ բան չէր նշանակի՝ բայց եթէ ասել, որ Բանակը

Իթիթհատին չպիտի բննադատի, Կառավարութեան բայ-
լերին չպիտի հետևի:

Միթէ Իթիթհատը ա՛յնքան միամիտ էր, որ չըմբռն-
ներ և չընդունէր՝ թէ Բանակին Իթիթհատական մե-
նատիրութեան նեցուկ լինելը ինքն ըստ ինքեան Բա-
նակին քաղաքականութեամբ զբաղւելն է:

Եւ Բանակը անկեղծօրէն քաղաքականութիւնից հե-
ռացնելը կը նշանակի ջնջել մենատիրութեան յենա-
րանը, որ սակայն Իթիթհատը չէր կարող կամենալ:

Նշանակալից էին այդ տեսակէտից Շէվքէթ փաշայի
Ծերակոյտի առաջ արտասանած խօսքերը, երբ գնացել
էր Խորհրդարանից շուտափոյթ բեհարկած օրէնքը
Ծերակոյտի առաջ էլ պաշտպանելու և բեհարկել տալու
համար ու մօտաւորապէս այսպէս էր ասել. — «Այս
օրէնքը բաւական չէ, կուսակցութիւններն էլ պէտք է
ձեռք բաշեն Բանակը քաղաքականութեամբ զբաղեց-
նելուց»:

Եւ պատերազմական նախորդ նախարարը յաջորդ օրը
հրաժարւեց: Մի պարագայ՝ որ բնականաբար խորհըր-
դաւորութեան մէջ կը թողուր, թէ նախարարը զոհեց
Իթիթհատական մի կօմպրօմիսի համար, թէ ստիպու-
ցաւ ինք տեղի տալ Ծերակոյտի առաջ իր յայտա-
րարութեան արամադրութիւններով:

Թիւրիմացութիւն էր պաշտպանել Բանակի քաղաքա-
կանութիւնից հեռի մնալու գաղափարը:

Թիւրիմացութիւն էր պաշտպանել՝ թէ Բանակը շարժ-
ւելու է միմիայն Սահմանադրութեան դէմ հարւած
տրւելու պարագայում:

Սահմանադրութեան դէմ հարւած տրւելու, սահմա-
նադրական ռէժիմը ապաւելու բազմաթիւ ձևեր ու
աստիճաններ կան: Եւ միթէ չէր կարելի ունենալ այն
տեսակէտը, որ յանուն սահմանադրականութեան, յա-
նուն կ'արգի պատհանութեան Իթիթհատեան
օրէնսդրական փոփոխութիւններն ու առժամանակեայ
օրէնսդրութիւնները Սահմանադրութեան դէմ հարւած-
ներ չէին, դիկատատուրա չէին:

Եւ աւելին: Ի՞նչ աւելի մեծ վտանգ, բան հայրենիքի
գոյութեան դէմ սպառնացող վտանգը: Եւ միթէ ամեն
կողմից չէր լսոււմ, թէ տիրող քաղաքականութիւնն ու
ներքին և արտաքին բարդութիւնները հայրենիքի գոյու-
թեան վտանգ են սպառնում:

Բանակը ջղից ու արիւնից զուրկ պիտի լինէր այս
ընդհանուր դրութեան դէմ անտարբեր հանդիսատես
լինելու համար:

Օրէնքները մեռած տառ են՝ եթէ կեանքից չեն
բղխում:

Կասկած չի կարող լինել, որ կօնտրօլը միայն բա-
նակին կամ նրա մի մասին վիճակած լինելը՝ չի երաշ-
խաւորի լաւ ելք, փրկութիւն:

Հարժումը գոյութիւն ունէր: Ո՛չ մի դատապարտու-
թիւն նրան չէր կարող կասեցնել:

Շէվքէթ փաշայից յետոյ, Իթիթհատեան նախա-
րարութեան մէջ պատերազմական նախարարութիւնը
ստանձնելու համաձայնող չգտնելը, ելեւտական նախա-
րարութիւնը երկար ժամանակ բաց թողնելու ստիպւիլը,
վերջապէս հարկադիր Սայիտ փաշայի դահլիճի հրա-
ժարւիլը սատրազամների նախարարութեան կազմել—
սրանք բոլորն էլ հետեանք էին այդ շարժումին և շար-
ժումին ծնունդ եղողները իրաւունք չունին իրենց ծնո-
ղին դատապարտել:

Իթիթհատը զիջումներով, տեղատուութիւններով կար-
ծեց ժամանակաւորապէս կասեցնել կամ սահմանափակել
այդ շարժումը, բայց պարլամենտական իր մեծամաս-
նութեան դէմ ուղղուող պահանջները նրան ղջանա-
ցնում էին և ինքն էլ կազմակերպում էր հակադիր
շարժում՝ դարձեալ Բանակից: Ոտնակոխում էր իր
օրէնքը իր իսկ ձեռքով:

Ո՛ր պիտի յանգէին այս հակադիր շարժումները:

Դժւար էր պատասխանել:

Միայն միութարական յոյսը նրանում էր, որ արտաքին
թշնամիի դէմ կը միանան: Բայց դժւար չէր գուշակել
հաւանականութիւնը ներքին քաղաքական կուռի, որի
ակտիվ բաժինը դարձեալ Բանակին էր վերապահած
երևում:

Կը տարածէ՞ր շարժման ակտիվ մասնակցութիւնը և
Բանակից դուրս, և ե՞րբ:

Հաւանական պատասխանը տալու հիմքերը պակա-
սում էին:

Բայց այն օրը, որ Բանակով սահմանափակւած չէր
լինի իրական շարժումը, այն օրը միայն պիտի սկսէր
այս Երկրում իրական յեղափոխութիւնը:

Ո՞ր կողմը պիտի յաղթէր տեղի ունենալիք քաղա-
քական ներքին կուռի մէջ: Պիտի կատարէ՞ր արդեօք
փրկարար յեղաշրջումը, չպիտի՞ օգուէր արդեօք ռէաք-
սիօնը և կամ թշնամիները ժամանակ պիտի տայի՞ն, որ
ներքին կուռիները վերջնաւն առանց վտանգի. — ան-
վերջ ու մտատանջ հարցումներ էին՝ որոնց պատասխա-
նել անհնար էր:

Անհնար էր մանաւանդ, որ այս բազմացեղ հրկրի
մէջ ընդհանուր գործակցութիւն չկայ, ու տիրապետող-
ներից և ալըմնական գէնի ձեռքին կուռիներից դուրս՝
չէր երևում հաւանականութիւնը, որ Ազգային-Քաղա-
քական Առևտրականութիւններն էլ իրենց վճռող խօսքը
ունենան, իրենց կշռող դերը ունենան:

Առանց դրան՝ մութ ու անյուսադիր էր ապագան:

Դէպքերը եկան այս յոռետեսութեան աւելին իսկ
հաստատեցին:

Պատմական դարաշրջաններում և վերջին ժամանակ-
ներում միևնույնութեան ու գերիշխանութեան համար

միմեանց յօշոտող Բալկանեան ու Լագէական ծովի քաղաքական փոքրիկ Զանգեւոններն ու Ազգերը առաջին անգամը լինելով գլուխ բերեցին քաղաքակրթական անհրաժեշտութիւնը. — փոքրիկ Պետութեանց կամ Բալկանեան Դաշնակցութիւնը:

Այդ Դաշնակցութիւնը զենքի սպառնալիքով դրեց իր պահանջը Լեւոնական թիւրքերոյ ապականութեանցեալ ինքնավարութեան պահանջը:

Թիւրքիան մերժեց 1880-ի բարենորոգմանց ծրագրի խաղերով:

Թիւրքիան մերժեց փոքրիկ ներքին արհամարհելով իր Մեծութեան յաւակնութիւններով, և հաւանականաբար Սատրապ մաների նախարարութեան անդամակցող և իրականապէս նախարարապետը և Անգլիոյ մարգրէ եղող Քեամիլ փաշայի Անգլիայից գտնելիք օժանդակութեան յոյսերով:

Մինչ մի կողմից Սատրապներէի նախարարութիւնը կերպարանափոխուում և նոր տարրերով աւելի ուժեղ սիօնեական գոյն էր ստանում, Համիդեան Կամարիլլան ընդհանուր ներուժով Մայրաքաղաք էր վերադառնում, աւատականութիւնը ներքին ու արտաքին զրգուճեցողով քաջալերւած, ո՛չ-ընդհանուր՝ բայց իմպական սպանութիւնների, այան-թաւանների շարքն էր սկսում Հայաստանում, միւս կողմից Բալկանեան պատերազմն էր յայտարարուում:

Ու ի՞նչ պատրանք, ի՞նչ մերկութիւն:

Տասնէհինգ օրւայ մէջ ահաւելի տարգութեամբ փուլ եկան թիւրքի վաղեմի ռազմիկի համբաւն ու վերջի չորս տարիների մէջ վերակազմած բանակի կարողութեան ենթագորութիւնները, նրա վրայ դրւած յոյսերը:

Ինչպէս նոր թիւրքիան վերջին քառամեակում ապացուցել էր, որ հին ու նորի մէջ տարբերութիւնը միայն արտաքին շարժն է, որ կառավարելու, քաղաքական, քաղաքակրթական, պատմական անհրաժեշտութիւնների ըմբռնողների մէջ՝ երկուսն էլ էապէս միանոյնն են ու ընդունակ են միմիայն պառակտելու, քայքայելու և սպանդանոցներ ստեղծելու՝ այդպէս և ապացուցին, որ զինւորականութեան մէջ ևս, ո՛չ միայն մի բայլ առաջ չեն գնացել, այլ մանաւանդ աւելի յետ:

Կազմալուծումն՝ իր բոլոր ճիւղերի մէջ...

Փախչում է թշնամու առջևից բաղաձայն, անվարժ, հայրենիքի պաշտամունքից զուրկ, պետութեան վրայ հաւաքը կորցրած զինուոր. փախչում է փափկասուն, անփորձ ու այլասեռւած սպան:

Բացառութիւնները անզօր են՝ ոտնահարւած պատիւը վերականգնելու:

Բնական հետեանք փտախտի:

Ու Եւրոպան դառն փորձերից խրաւած, յուսահատ, նոր-Դաշնակցութեան՝ Եթեաներորդ Մեծ Պետութեան

յաջողութիւններից շշմած, այլ ևս չունի թիւրքիան փրկելու, առ նւազն Եւրոպայում նրա գոյութիւնը անհրաժեշտ համարելու իր վաղեմի նշանաբանը:

Թշնամին մայրաքաղաքի դրան մօտն է և գուցէ դեռ առաջ սլանայ, բայց չկայ այլ ևս Մեծ Ալթինի սպանալիքը յաղթական բանակը կանգնեցնելու:

Աւստրո-սերբ կնճիռը, այդ կնճիռի յետևում դաւող ու սեփական հաշիւների յարգարումին պատրաստող Ռուսիա, Ֆրանսա, Անգլիա, Գերմանիա, Իտալիա—երկու գլխաւոր համախմբութիւններ — եթէ միմեանց հետ բաղախին իսկ, այդ ո՛չ թէ Թիւրքիոյ գոյութիւնը պահպանելու, այլ ժառանգութիւնը բաժանելու, մանաւանդ անգլո-գերման մրցակցութեան մղումների, կանխամտածւած ծրագրերի համար են:

Ու վաղը պիտի կանգնի ինքնօրէն, անկախ Ալբանիան և ազատագրւած Մակեդոնիան՝ ո՛ւմ հետ էլ կապւի, պիտի մանի ծաղկումի, ուռճացումի շրջանը:

Իսկ Հայաստանը...

Եւրոպայից վտարւածները պիտի արշաւեն փոքր Ասիա՝ աւելի սուտարացնելու համար կեղծքիչների ու տգրուկների արդէն իսկ սուտար բանակը...

Մենք ենք, ո՛ր մեր խօսքը չունինք, մեր տեղը չունինք...

Վ Ա Ղ Ի Ն Ա Կ

Կ. Պոլիս

Կ Ե Ն Ս Ս Գ Ր Ա Կ Ա Ն

Հ Մ Ա Յ Ե Ա Կ Զ Ա Ն Փ Ո Ւ Ա Դ Ե Ա Ն

(«ՀԱՄՕ»)

1904 թվականի սկզբներում մի օր Ալեքսանդրօպօլի կենտրոնական կոմիտէի առաջ երևում է դպրոցական նստարանը նոր թողած մի թուխ պատանի, «ես եկել եմ ծառայելու Հ. Յ. Դաշնակցութեանը, վստահ չեմ տով յայտնում է նա, ես խնդրում եմ ձեզ, որ գործ տաք ինձ, տերթօր կամ Հայաստան գնալ. ես ուզում եմ մեռնել հայրենիքի համար»:

Այդ պատանին՝ Հմայեակ Զանփուլագեանն էր, «Համօն», բնիկ Վայոց Ձորցի, Կովկասում բաւական յայտնի մի ընտանիքի զաւակ, Լայնաթիկունք, տշխոյժ, կրակոտ շարժուձևերով, մանկութիւնից ձիու վրայ և հրացանը ձեռքին մեծացած: Իր ըմբոստ բնաւորութեան պատճառով կիսատ թողնելով դպրոցի դասընթացը, գժաւելով հօր հետ—իրեն ամբողջ հոգով ու մարմնով ներառեալ իր յեղափոխական շարժմանը՝ այնտեղ գտնելով իր ուժերի և զգացմունքների համապատասխան միջավայր:

Սակայն Ալեքսանդրօպօլի կոմիտէն նկատի առնելով նրա տարիքը, յեղափոխական ասպարէզում անփորձ լինելը, մերժում է նրան յանձնել մարտական գործեր, այլ որպէս շրջիկ-բարոյիչ՝ փորձւած շրջիկների ձեռքի

տակ, ոչ զարկում է Ըիրակի գիւղերը: Նա շրջում է գիւղերը, խօսում քարոզում, գիւղական ենթակոմիտեների հաշիւները քննում, զէնքի տեղափոխութեան մասնակցում, բայց այս ամենը նրա սրտով չէ. նրա անզուսպ հոգին կռիւ, հերոսական գործեր է տեսնում:

Այդ օրերում Ալեքսանդրօպօլը և Կարսը Ցաճկաշայաստան Ֆեդայական խմբի ուղարկելու համար պատրաստութիւններ էին տեսնում. անցնում էր Կայծակ Վաղարշակի խումբը, և մի քիչ յետոյ անցնելու էր Թումանի խումբը: Համօն խնդրում է կօմիտէին, որ

իրեն էլ վերցնեն խմբերից մէկի մէջ. սակայն նորից նոյն առարկութիւններով մերժւում է:

Յայտնի է Թումանի խմբի ողբերգական վախճանը: Գուցէ ո՛չ մի անգամ ոռոտական պաշտօնէութիւնը այնպէս ոտաց տակ չէր տւել մարդկային խիղճն ու պատիւը, բան այս դէպքում, երբ մի բուռն, սրբազան ոգևորութեամբ վառւած հայ երիտասարդներ գնում էին թիւրք զօրքի սւիների վրայով իրենց դարերով տառապած եղբայրներին օգնութեան. ոռոտ իշխանութիւնը լոյս-ցերեկով Օլթիի սահմանագծի վրայ, միացած թիւրք



Հ մ ա յ ն ո կ Զ ո ճ փ ո լ ա ղ ե ա ճ

զինւորների հետ, հրացանազարկ արեց հայութեան ամենաընտիր զաւակներին: Ազգերի ողատագրութեան պատմութիւնների մէջ այս եզակի տմարդ, յաւէտ անմոռանալի եղեւոյն,—ուր երկու արիւնոտ բռնակալութիւններ իրար ձեռք են տալիս մի մարտիրոսող ժողովրդի դէմ—զոհ գնացին նւիրական Թումանը, Ըիրակեցի Ցերտերը, Ալեքսանդրօպօլի սքանչելի Վաղօն ու Մարտին Ստեփանեանը, հռչակաւոր Որսորդ-Գեորգը և միւս լուսահոգի նահատակները: Ամբողջ հայութեան վրայ սուգ ու սարսափ տարածւեց, և միևնոյն ժամանակ վրէժի և ցասման հուժկու ձայներ յեղափոխական լայնածաւալ խաւերում... Ետեւորը բուռն փափագ յայտ-

նեցին վրէժխնդիր լինելու այդ եղեւոյն կատարող Բըկոյի կոչւած բորենուց, որ Օլթիի կազակների վաշտի պետն էր. սակայն այդ պատիւը վիճակեց պատանի Համօն:

Համօն խնդրում-պահանջում է Ալեքսանդրօպօլի կօմիտէից, որ իրեն յանձնւի այդ տերրորը, համոզելով, որ ինքը յաջող կը կատարէ, բանի որ լաւ ծանօթ է Օլթիին, իրենք այնտեղ աղի հանքեր ունին, Բըկօփի հետ անձամբ ծանօթ է, նա կարող է այդ գազանին հէնց իր բնակարանում սպանել. մերժման դէպքում ինքը իր սեփական նահաձեռնութեամբ, ինքնագլուխ կը գնայ և կը կատարէ Կօմիտէի ընկերներից մի քանիսը դիտել և

ուսումնասիրել էին Համօի ուժեղ բնաւորութիւնը, համոզմունք էին գոյացրել նրա անյողողող կամքի և յանդգնութեան վերաբերմամբ: Վերջապէս որոշուում է և նա գնում է Օլթի Մի քանի օրից յետոյ վերադառնում է նա, գործը յաջող կատարած. Բըկովը Համօի վրիժառու ձեռքից գնդակահար ընկնում է հէնց իր թիկնապահ կազակի աչքերի առաջ: Այդ կատարուում է 1904 թւին օգոստոսի առաջին օրերին:

Համօն տեղափոխուում է Թիֆլիս: Նոյնպիսի յաջողութեամբ նա գլուխ է բերում մի պրիստաւի տերօրը Թիֆլիսի ամենաբանուկ փողոցներից մէկի վրայ: Այդ պրիստաւը մեծ եռանդ էր ցոյց տալիս դաշնակցականներին հետևելու, խուզարկելու, զէնքեր գրաւելու մէջ:

1905 թւի փետրւարին, Բագում բռնկում է նոյն ուսական պաշտօնէութեան սաղորած այն մեծ արիւնոտ խաղը, որ յայտնի է «հայ-թաթարական ընդհարում» անունով: Թաթարական խուժանը յարձակում է հայերի վրայ. յանկարծակիի եկած հայերի մէջ հանդէս են գալիս միայն մի քանի տասնեակ դաշնակցական զինւած երիտասարդներ, որոնց քաջագործութիւնների մասին շատ է գրւած իր ժամանակին: Համօն այդ անձնէր քաջերից մէկն է լինում, որ ականատեսների վկայութեամբ ամենայն անվեհերութեամբ կուսում է, փողոցից փողոց անցնելով և մաքրելով հայ թաղերը գազանացած Թաթար խուժանից:

Երբ ապացուցւում է, որ Բագւի թաթարական յարձակումը ներշնչւած և կազմակերպւած է եղել նահանգապետ Նակաշիձէի ձեռքով, որ յայտնի էր իր հայատեցութեամբ, առաջ էլ իբրև երևանի նահանգապետ (Փակագծի մէջ ասենք՝ նա էր, որ գրոհ տւեց Էջմիածնի հինաւորաց սրբավայրը և ծերունազարդ հայրապետի աչքերի առջև կազակներով խորտակեց մայր աթոռի գանձարանի դռները կողոպտելու համար վանքի երևակայեալ հարստութիւնները):

Կ. Յ. Դաշնակցութիւնը չյապաղեց իր մահափճիւր այդ դաւադիր բերօկրատի նկատմամբ, և գործը յանձնեց Համօին և նրա նման անձնուրաց հերոսներին. սակայն, այս անգամ բախար դաւաճանեց անվեհեր Համօին:

Երբ նրանք ընկերներով Բագւի բաղաբային պարտիզում սպասում էին Նակաշիձէի գուրս գալուն, յանկարծ շրջապատում են լրտեսներով ու ոստիկաններով և դէպի ոստիկանատուն տարւում: Համօն փախչում է ոստիկանատնից. ոստիկանները հետապնդում են և գընդակների տարափի տակ գետին ձգում այդ աննկուն անվախ պատանի հերոսին:

Այդպէս վերջանում է այս մատաղ, վառվռուն և ուժեղ կեանքը, որ մեր անմոռաց, օրերի ընկերը հերոսական վճռականութեամբ դրել էր հայրենիքի սեղանի առաջ: Կարճ ապրեց նա, սակայն այդ կարճ

կեանքը մի մրրիկ էր, որ գիտէր թռչել կուրց կուր, յաղթանակից յաղթանակ:

Թո՛ղ անջնջելի մնայ նրա պայծառ անունը...

ՀԱՅ-ԳՈՒՍՍՆ

ՄԱՐՏԻՐՈՍ ՅԱՐՈՅԵԱՆ

(«ՅԱՐՈ»)

Մարտիրոս Յարոյեանը—մէկն է նրանցից, որ դուրս են եկել մոռացութեան խորշերից, աղքատութեան ու զրկանքների ծոցից՝ իրենց ծնող ժողովրդի կորացած մէջքն ուղղելու, հայ ցեղի ապրելու կորովը ցոյց տալու. նրանք, ժողովրդի այդ իսկական, համեստ հերոսները, որ անթիւ են և անչափ, մնում են անանուն, համարեա մոռացւած, նման երկնքի աստղերին, որ լոյս կուտան, բայց անուն ու թիւ չունին:



ՄԱՐՏԻՐՈՍ ՅԱՐՈՅԵԱՆ

Մարտիրոսը ծնւել է Ալեքսանդրօպօլում 1880 թւին, չքաւոր ընտանիքից. սկզբնական կրթութիւնը ստացել է տեղական հայ-ծխական դպրոցում: Սակայն 1896 թւին ուսու կառավարութեան կարգադրութեամբ փակւելով հայ դպրոցները՝ հազմաւոր մանուկների հետ նա էլ փողոց է շարտուում: Փոխանակ ուրիշ տղաների պէս պարապ բաշ գալու, նա նւիրւում է ընթերցանութեան, ձեռքն ընկած հայ գիրքը կարգում. առանձնապէս սիրում է հայոց և ազգերի ազատագրական կռիւների պատմութիւնները:

Հայրը նրան մի կտոր հացի տէր դարձնելու համար տալիս է՝ բարտաշութեան—որմնագրութեան արհեստին, որ մասնաւորապէս զարգացած է Ալեքսանդրօպօլում: Այդ շրջանում նա նորից չի թողնում ընթերցանու-

Թիւնը, հաւաքում է իր գլխին մի բանի ընկերներ, միասին կարգում են, հետեւում են յեղափոխական հրատարակութիւններին, և նոյնիսկ իրենց չափազանց սուղ միջոցներով Շիրակի գիւղերից մէկում մի գաղտնի գրադարան են պահում: Կրօն հարուստ հոգին հանգիստ չի գտնում արհեստի մէջ, շուտով թողնում է արհեստը և ամբողջապէս յանձնւում է յեղափոխական գործունէութեան, որ այդ թւականներում Ալեքսանդրօպօլում շատ թոյլ էր, բայց և այնպէս մի խմբակ կար, որ լուռ ու մունջ շարունակում էր յեղափոխական գործը—զէնք ձեռք բերել և ուղարկել Թիւրքիա: Իր շրջանի երիտասարդներից խմբեր է կազմում—մարտական և դրամական, նոյնիսկ կարողանում է կանանցից էլ մի խումբ կազմել—«Սօսի» անունով (Սերոբի կնոջ անունը), որը ժամանակագրական կարգով առաջին կանացի խումբն է լինում Ալեքսանդրօպօլում:

Մարտիրոսը, որ այնուհետև «Թարօ» անունով է յայտնւում, ընկնում է գիւղերը, թէ խմբեր կազմում, քարոզելով յեղափոխական գաղափարը, թէ փոքրիկ գրադարաններ հիմնում: Առանձնապէս մի խմբակ էլ է կազմում, խոսք արկ ու անունով, որի գործն է լինում՝ հետեւել Թիւրքերին, որ Ցաճկաստանից գալիս էին զէնքեր գնելու: Բիւջ չէ պատահել, որ նրանք կամ խանգարել են զէնք գնելը կամ խել են զէնքերը, կամ այդ Թիւրք գործակալներին ոտով-գլխով անյայտացրել են...

1902 թւի պետական զօրահաւաքին՝ Թարօյին վիճակում է զինւոր լինել և գնում է Ռուսաստան. սակայն մի բանի ամիս յետոյ, նա փախչում է զինւորական ծառայութիւնից, գալիս է Կովկաս Թիւրքա-Հայաստան անցնելու համար: Արայ է հասնում 1903 թւականը—այդ պատմական տարին՝ հայ եկեղեցիների կալւածքների գրաւման տարին: Ժողովրդական համառարած խանդավառութեան այդ շրջանում պակաս չէին և մատնիչներն ու լրտեսները, որ ստեղծում էին այդ հերոսական օրերը: Դրանցից մէկն էր ոմն կաւալէր Պետրոս Վարապետեան՝ Վարսի գաւառապետի թիկնապահը: Լ. Յ. Դաշնակցութեան որոշումով, Թարօն օգոստոսի առաջին օրերին Ալեքսանդրօպօլում, ահագին բազմութեան մէջ, ատրճանակի մի բանի հարւածներով վերջ է տալիս այդ ամարդ հայի կեանքին:

Այնուհետև Թարօն վարսումն է: Պատրաստւում էր Հայաստան գնալ Խանի մեծ խումբը: Թարօն ֆէդայի է: Սակայն, Վարսի կենտ. կոմիտէի կարգադրութեամբ նա յետ է ընկնում կատարելու կարսեցի Շարիֆ Լաչիմ-Քէկովի տերօրը, այդ հարուստ, գիրքով թիւրքը ոռւսպետական պաշտօնեայ էր և միևնոյն ժամանակ Թիւրք կառավարութեան գործակալ, որ շարունակ իր կազմակերպած լրտեսների միջոցով լուրեր էր հաւաքում ու հաղորդում «Դաշնակցութեան» գործունէութեան և խմբերի մասին Թիւրք կառավարութեանը: Օրը ցերեկով

Թարօն սպանում է նրան. ոստիկանը՝ հետապնդում է Թարօյին, սակայն խիզախ ֆէդային ծանր վիրաւորում է այդ ոստիկանին, և ազատւում, գնում, միանում Խանի խմբին:

Թարօն իբրև ձիաւոր-առաջապահ՝ խմբի հետ անցնում է սահմանը: Թայտնի են Խանի մեծ խմբի յանդուգն և օրեր տեղ կռիւները Թիւրք զօրքի, համիդէի և բիւրդ ու Թիւրք խուժանի հետ Գոմաձորում, Բոցիկի սարում և Բասենի դաշտերում: Թայտնի է նոյնպէս այդ կորույթի խմբի անսահմանօրէն ցաւալի վախճանը—1903 թւի սեպտեմբերի կիսին: Խումբը մնալով առանց փամփուշտի և հացի, օրհասական կռիւ է մղում, ուր ընկնում են ահագին թւով ռազմիկներ. ազատւում են մի երեսուն հոգի միայն: Թարօն ևս ընկնում է:

Ցարիններ մնացին մեր ներսկան հերոսների նշխարները լեռների և ձորերի մէջ, վայրի հաւքերի կերակուր, անձրեւի, ձիւնի և քամու բերան: Հայ գիւղացիները սիրտ չէին անում անցնել այդ սրբազան վայրով, որովհետև Թիւրք գիւղերի սահմանների մէջն է գտնւում. միայն երբեմն-երբեմն վախով, գիշերները գաղտնի, ամենայն երկիւղածութեամբ հաւաքում էին մեր նոր վկանքի, ցիր ու ցան մասունքները, որ իբրև նոր կեանքի Թարութեան սերմեր ցանւած են հայոց աշխարհի արիւննոտ հողերում... հաւաքում են և թաղում եկեղեցիների գաւիթներում:

Սակայն, օսմանեան սահմանադրութեան առաջին խոսք օրերում, Թիւրք գիւղացիները հայերի հետ գնացին, լալով ու համբուրելով հաւաքեցին մնացած նշխարները՝ թողութիւն աղբրսելով իրենց անգիտակից յանցանքի համար և մեծ հանդիսով ամփոփեցին հայոց գերեզմանատանը...

Ո՞վ գիտէ, սակայն, թէ արդեօք Թարօի նշխարները հանգչում են եղբայրական շիրմի մէջ, թէ՞ ջուրն ու քամին, հաւքն ու թռչունը բշեւ-տարել են ձորից ձոր և սարից սար, և ո՞ր քարի տակ թաղել, ո՞ր հողի մէջ խառնել...

Թարօի Ալեքսանդրօպօլի ընկերները կենսագրական տեղեկութիւններ հաղորդելով նրա մասին, այսպէս են վերջացնում գրութիւնը.— «Թարօն անկեղծ և եռանդուն յեղափոխական էր. և նրա վերջը պսակւեց անձնւիրութեան պաշտելի օրինակով. թող մեր ընկերոջ շերիմը անյայտ լինի, բայց մեր սիրտը նրա շիրիմն է՝ միշտ կենդանի պահելու և պատկերացնելու նրա սուրբ յիշատակը»:

ՀԱՅ-ԳՈՒՄԱՆ

Ն Ա Ց Ա Ղ Է

Ցաւով ենք արձանագրում այդ վաղաժամ և անակնկալ մահը: Առողջ, զւարթ, կենսուրախ մի երիտասարդ, որ արքայի զրկանքներում, նիւթական ծայրագոյն թշուա-

նութեան մէջ՝ երբեք ընկճել չգիտէր, որովհետեւ ապ-
րում էր մաւուր, գաղափարական սնունդով, խօսում էր
անդադար ու խանդավառ, պաշտպանում էր եռանդով
ու համոզումով ընկերական շրջաններում իր սիրած
թեզիսները և պատրաստ էր իր կեանքը զոհաբերել
յանուն այդ թեզիսների:

Մի ծանր, աղէտաւոր պատահար էր, որ կտրեց այդ հա-
ճապակրելի կեանքի թելը: Նստածէն մեռաւ մի քանի ամիս
առաջ, Կ. Պոլսում, հեռու իր կովկասեան հայրենիքից, գեղա-
ծիժաղ Վրաստանից, ուր գործել էր 1905—1906-ի եր-
կունքի օրերում և ուսկից տաքաբուրել էր նախ Ռուսաստան
ապա—նիւթական հոգսերի ճամբու վրայ—դէպի Բոս-
ֆորի եղբրբքը: Այդտեղ նա օտար չէր զգում ինքզինքը,
գրեթէ միշտ մերայնոց շրջանում էր, մեզ պէս մտածող
ու զգացող, մեզ պէս տարագիր և ըմբոստ: Հանգու-
ցեալը ծագումով վրացի էր, բայց պատկանում էր մի-
ջազգային յեղափոխական բանակին, գործել էր ռուս
սօցիալիստ-յեղափոխականների շարքերում, գրել էր բազ-
մաթիւ և շահեկան յօդւածներ ազգային ու տգրա-
րային խնդիրների մասին, «Գործել» կեղծանունով: Գրիչ
ունէր և գիտութիւն—և դրա հետ մի ազնիւ, շիտակ
հոգի, մի անկեղծ, անաչառ միաբն ուր այնքան, դժբախ-
տաբար, հազաւագիւտ է վրացական ու ընդհանրապէս
կովկասեան հրապարակագրութեան աշխարհում...

Այդ հանգամանքն իսկ առանձնապէս զգալի է դարձ-
նում մեզ համար՝ նստածէի ողբերգական մահը:

Պ Ա Տ Մ Ա Կ Ա Ն

ՀԱՅԿԱԿԱՆ ՇԱՐԺՄԱՆ

ՆԱԽԱՊԱՏՄՈՒԹԻՒՆ

VIII

ՎԵՐԱՆՆՈՒԹԻՒՆ ԾԱՌԱՌՈՒՄԸ

ԱՐՆԱՄԱՏՆԱՆ ՀԱՅՐԻ ՄԷՔ

Բ.

Թիւրքմանայ ուսանողութիւնը 40-ական քաղաքներում.—Ազդեցութիւն-
ներ.—Պատմական անցեցողութիւնը.—Սեղափոխու-
թիւն և հայրենասիրութիւն.—Լամարսիմի հաւր Մուրադեան վարժա-
րանի բացումը.—Թիւրքմանայ համալսարանականի և հանրային գոր-
ծիչի խնդիր.—Գրիգոր Օսեան՝ վաղեմի հայ ուսանողութեան մասին.—
Ռուսիոյն և Պալեստինայ.—Ազգային Սահմանադրութեան յղա-
ցումը.—Հայ մամուլը Թիւրքմանի մէջ.—Հայրենասիրական բնադր.—
Հայր Ալիբեան, իր դէմքը և իր գործը.—Հայկական ըմբոստացման
եփոքորներ.

Քառանկան թւականներում ենք:

Հայ ուսանողութիւնը երեւան է գալիս արեւմտեան
ուսման տաճարներում, հայ առաջին համալսարանական-

ները *) — ձիրքոտ, տոկուն, ուսումնասէր — ագահօրէն
կլանում են եւրոպական մտքի արդիւնները, որպէս զի
գան պատւաստելու հայրենիքի խոսքն միջավայրին:

Եւ թիւրքահայ վերածնութեան այդ առաջին ծիծեռ-
նակները տոգորւած են ընդհանրապէս արմատական
դաւանանքներով, զեմօկրատիզմի, ռամկավարութեան հա-
ւատամքով, և խանդավառ, ազատաշունչ հայրենասի-
րութեամբ:

Պարիզը կենտրոն է և սիրւած ժամադրավայր մեր
փոքրաթիւ ուսումնասէր երիտասարդութեան: Պարիզի
մէջ հաստատուել էր Միւսիթարեան-Մուրադեան վար-
ժարանը, Պարիզի մէջ խմբել էր ապագայ հայ գոր-
ծիչների պլէադը.— Նիկողայոս Պալեստին, խաչատուր
Պարտիզյան, խաչատուր Միսաբեան, Նահապետ Ռու-
սինեան, Գրիգոր Աղաթոն, Կարապետ Իւթիւճեան,
Գարբիէլ Այվազովսկի, Ամբրոսիոս Գալֆայան, Խորէն
Գալֆայան, Յովսէփ Շիշմանեան (Ծերենց) և Լուրիշներ:

Պարիզը կենտրոն էր և ամբողջ մտածող աշխարհի
ուշադրութեան...

Հազաւագիւտ մի շրջան էր: Ըմբոստութեան շունչ էր
անցնում ամբողջ արեւմտեան եւրոպայով և Պարիզը
պատրաստում էր 1848-ի աշխարհադժոգ փոթորիկը:

Յեղափոխական խօսքը հնչում էր գաղտնի, դաւա-
դրական ակումբներում — Բլանկիների որոտախօս շըր-
թունքներով—յեղափոխական միտքը այլ և այլ ձևերով
արծարծւում էր մամուլի ու գրականութեան մէջ: Բառ-
բառում էր անդամ համալսարանական ամբիօններից:
Լամարտին, Վիկտօր Հիւգօ, Դը Միւսսէ
հնչեցնում էին իրենց դիւթիչ քնարի դալայլները:
Օգիւստ Կօնտ ծանուցանում էր աշխարհին պօզի-
տիվիզմի արմատական, փրկարար հաւատամքը: Միշտ
և Գիւգօ հրատարակում էին իրենց անմահ գործերը:
առաջինը ֆրանսիական Յեղափոխութեան դաւաքներն
էր պատմում իր թեւաւոր, անզուգական լեզուով ու
ոճով, երկրորդը համաշխարհային բաղադրութեան
ընթացքն էր ուրուագծում իր ներհուն գիտունու-
թեամբ, ճշմարտախօս գրչով: Երկուսն էլ հաւակում էին
իրենց մեծ հայրենիքի առաջ ապահովելու ընդ-
հանուր բաղադրութեան պրօցեսի մէջ: Էդգար
Բիւնէ, մի այլ հանձար, շարունակում էր վօլտերեան
աւանդութիւնը, թունաւոր ոճով խորազանում կրօնի ու
կղերի կեղծիքները, մարդկութեան խղճի վրայ լեռնա-
ցած նախապաշարութիւնն ու սնապաշտութիւնները: Եւ
պարիզեան ամբիօններից որոտում էր ազատ մտքի
քարոզը նոր կեանքի ծարաւի երիտասարդութեան
ականջներին... Վրայ է հասնում, վերջապէս, փետր-

*) Եղել են, անշուշտ, հայ ուսանողներ նաև քառանկա-
կան թւերից առաջ, բայց բուն խմբական հոսանք, որոշ գու-
նաւորութեամբ, ծայր է տալիս 40-ական թւականներին:

ւ ա ղ Ե ան Յ Ե ղ ա փ ո խ ու թ իւ ն ը (1848 թ.), որ անմիջապէս փոթորկում է եւրոպական ցամաքը, հրդեհեցելով մի շարք մայրաքաղաքներ, խորտակելով միապետական գահերը...

Ահա մի այդպիսի պատմական մթնոլորտում էր ուսանում հայ անդրանիկ համալսարանական բոլորը՝ նրա անդամները հանդիսատես են պատմութեան այդ վեհ դրամաներին, ոմանք նոյնիսկ փորձում են իրենց բաժին մասնակցութիւնն ունենալ։ Պարիզը նրանց դաստիարակն էր և ոգևորութեան աղբիւրը, պարիզեան եռող կաթնայի մէջ նրանց զգայուն հոգին կրում էր ուժգնօրէն անցքերի ազդեցութիւնը, որդեգրում Յեղափոխութեան պանծալի սկզբունքները, որդեգրում մասնաւոր հայրենիքի ու ժողովրդի պաշտամունքը... և սրտի կսկիծով յիշում էին նրանք իրենց փոքրիկ հայրենիքը Ասիական Արեւելքում, ծրարած ստրկութեան և խաւարի անթափանցիկ մառախուղով...

Յիշում էին և խորհում և յղանում «ծրագիրներ»... Ծրագիրներ ա զ Գ ա յ ի ն վ Ե ր ա ծ ն ու թ Ե ան, ոչ միայն մտաւոր, կուլտուրական, այլ և... բաղադրական։ Այդտեղ է յղացւում 1863-ի Սահմանադրութեան նախագիծը, ի դէմս «համաստեղութեան» երկու խոշոր դէմքերի՝ Նիկողայոս Պալեանի և Նահապետ Ռուսինեանի։

Որքան յոյզեր ու յոյսեր, ո՞րպիսի տենդային խանդավառութեան օրեր։ Եւ ինչպէ՞ս չվառէր այդ ազնիւ երիտասարդութիւնը, ինչպէ՞ս նա չբռնէր հայրենասիրութեան տենդով այդ հազագիւտ օրերում, երբ ինքը Փրանսիական հանրապետութեան արտաքին գործերի մինիստրը, Լամարտին, հանդիսաւոր կերպով, Մուրադեան վարժարանի բացման իր ճգնի մէջ, տալիս էր հայ ազգին հասունութեան վկայական, ներբողում էր նրա լեզուն, որոշում էր նրա գերը, արժէքը...

«*La République Française*—ասում էր տիեզերահռչակ բանաստեղծը, դիմելով իր առջև համախմբած հայազգի հանգիսականներին *)— *envisage la grande question de la régénération orientale*...

«... *Les germes de la nationalité orientale dont vous êtes l'un des plus puissants rameaux, se développent... en France... L'étude de votre belle langue arménienne est utile aux français et réciproquement*» **)... (Փրանսիական հանրապետութիւնը իր մասնօրէնութեան առարկայ դարձրած է Արեւելքի վերածնութեան մեծ խնդիրը... Սաղմերը արեւելեան ազգայնութեան, որի ամենակենսունակ ճիւղերից մինն էր դուք, զարգանում են Փրանսիայում... Ձեր հայկական սիրուն

լեզւի ուսումնասիրութիւնը օգտակար է Փրանսիացիներին և—փոխադարձաբար)...

Հայ ուսանողները հետամուտ էին մեծ մասամբ գործնական գիտելիքների, ընտրել էին այլ և այլ մասնաճիւղեր, ոմանք բժշկութիւն, ուրիշները՝ ճարտարապետութիւն, ուրիշները՝ մանկավարժութիւն, մի երկուսը՝ աստուածաբանութիւն։ Գործնական մասնագիտութիւնները գերիշխող էին այն ժամանակ, իբրև ազգային նահապետական իրականութեան մի պահանջ։ Հակակաւ տրհետը, որ մինչ այն մատակարարել էր իր արդիւնները տիրապետող ցեղին, չէր այլ ևս կատարելագործւում և 19-րդ դարի առաջին կիսում՝ չէր այլ ևս գոհացնում մարդկանց պահանջները։ Անգամ թիւրքի—եւրոպացիական թիւրքի—կենցաղն ու ճաշակը բաւականաչափ նրբացել էին և պահանջները բազմացել, —մինչդեռ հայ արհեստը մնացել էր քարացած իր հինաւուրց ձևերի մէջ։ Պօլսի և Զմիւռնիայի թիւրքը սկսել էր հագնւել եւրոպական ճաշակով—այդ վերջինը մեծ տեղ էր գործել նրա նիստ ու կացի մէջ... Պէտք էր զարկ տալ ճարտարարւեստին, ընդօրինակել եւրոպային։ Եւ պէտք էր շտապել... Ահա թէ ինչու «գործնական կրթութեան» տենչը առանձնապէս շեշտւում էր այն ժամանակաւ թիւրքահայ հասարակութեան մէջ և գրեթէ արհամարհած էր տեսականը, «վերացականը»։ Նոյն երեւոյթը, կարելի է ասել, աւանդաբար պահպանւել է մինչև օրս։ Այդ արհամարհանքը յայտնապէս բարոյւցում էր թիւրքահայոց նորարոգող մամուլի մէջ։ Քառասնական թւականների վերջերում, տնտեսական գիտութիւնների ամենայայտնի ժողովրդականացնողը, Զօրայեան, «Հայաստան» լրագրի մէջ յորդոր էր կարդում հայ ուսանող երիտասարդութեանը՝ ոյժ տալ նախ «հաց վաստակելու գիտութիւններուն», ոչ այնքան՝ լեզագիտութեան, գրականութեան, փիլիսոփայութեան։

«Մեզի առաւել պէտք եղածը անանկ մարդիկ են, որ երկրագործութիւն, մեքենագործութիւն, ճարտարարւեստութիւն, վաճառականութիւն, բժշկութիւն սովորեն» ³)։

Նոյն «Հայաստանը» գրում էր դեռ 1846 թ. յուլիս 6-ին.

«Հինգ-վեց տարւան մէջ ազգիս երիտասարդներէն շատ հոգի գէպի եւրոպայի զանազան կողմեր գիւնցին, ուսման համար ծարաւի սրտերին զովացուցին... և ասոնցմէ կանուխ ոտքի ելլողները շահաւէտ արհեստներն ձեռք բերելով, արդէն դարձան իրենց հայրենիքը և... ձեռքբերուն եկած նպաստն ալ չեն խնայեր ազգին»...

Դրանց մէջ էր Յարութիւն Յատեան, որ յետոյ դար-

*) Փետրարեան Յեղափոխութիւնից քիչ յետոյ էր։

**) Lamartine, Discours lors de l'inauguration à Paris du Collège arménien de Samuel Moorat.

³) «Հայաստան», 5 փետր. 1849.

ձաւ Արթին փաշա, գրեթէ ղեկավար թիւրքիոյ արտաքին քաղաքականութեան:

Այդպէս էր նշանաբանը: Կեանքը, սակայն, պատմական բացառիկ վայրկեանը մղում էր Հայ ուսանողներին և դէպի Սօրբօնի այլ ամբիօններ, ուսկից նրանք կարող էին լսել նաև «վերացական» կամ ուրիշ խօսքով քաղաքական ու հասարակական գիտութիւնների վերջին խօսքը: Լսում էին նրանք այդ գիտութիւնները, ըստ երևոյթին կցկտուր, պատահաբար, ի միջի այլոց: Լսում էին և վառուժ: Սիրտերը բարձրանում էին և ուժգին բաբախում փրանսիական անցքերի ժխորի մէջ, յեղափոխական հռետորութեան թովիչ ազդեցութեան տակ...

Այդ վերջինը մշակում է, մարզում թիւրքահայ երիտասարդին, պօլսեցուն, որ արդէն իսկ արտիստ է ի ծնէ, իր բնութեամբ, խառնածոքով: Նա հետևում է իր գործնական մասնաձիւղին, գնում է երբեմնապէս ունկնդրելու Սօրբօնի փիլիսոփային ու պատմագրին, սակայն նրա ուշքն ու միտքը գրաված են բանաստեղծների քնարաշունչ մարզանքներով, բեմբասաց քարոզիչների մեծադորդ ճառերով... Նրա միտքը գործում է, զգացմունքը՝ աւելի ևս. քինէն, Գիզօն, Կօնտը ազդում են թիւրքահայ ուսանողի հոգու և մտայնութեան վրայ, բայց անհամեմատ աւելի են ազդում Հիւլօն և Լամարտինը:

Այն ժամանակից, կարելի է ասել, դարձնեց թիւրքահայ մտաւորականի և հանրային գործիչի տիպը: Աւելի ճարտասան՝ բան հետախոյզ-հրապարակագիր: Աւելի բանաստեղծ՝ բան մտածող-ուսուցիչսիրող: Եւ երբ թերթում էք թիւրքահայոց մամուլը XIX դարի քառասնական թւականներից, չէք կարող չնկատել այն ծայրայեղ մտաւոր աղքատութիւնը, որ տիրում է նրա մէջ: Ամբողջ տասնեակ տարիների ահագին տարածութեան վրայ՝ դուք հազիւ կը գտնէք մի բանի քիչ-շատ լուրջ ուսումնասիրութիւն՝ հասարակական, տնտեսական կամ քաղաքական խնդիրների շուրջ:

Այդ տիպը հարազատութեամբ գտնում էք թիւրքահայոց զարգացման բոլոր շրջաններում. այդ տիպի հիմնագծերը մենք տեսնում ենք ամեն կարգի հանրային ու քաղաքական գործիչների մէջ, անգամ նրանց՝ որոնց վիճակած էր առաջնակարգ դեր խաղալու ոչ միայն իրենց հարազատ հայրենիքի, այլ և ամբողջ թիւրքիոյ քաղաքական ու գիւնագիտական էւօլիւսիօնի մէջ:

Բանաստեղծ էր Գրիգոր Օտեան, օսմանեան սահմանադրութեան նշանաւոր ռազմիրան, որ մէկն էր 1848-ի գաղափարներով սնւած «համաստեղութեան» անդամներից: Երբ նա գրում է 40-ական թւականների հայ մտաւոր սերնդի մասին, նրա կրած ֆրանսիական ազդեցութիւնների ու հովերի մասին, — ամենից ուժով

ու խանդավառութեամբ նա ներբողում է «Լամարտինի, Թիէոֆիլի, Կիզօի զբարձրաթուիչն պերճախօսութիւն»...

... «Բանաստեղծ մը կը նախագահէր (փետրուարեան) յեղափոխութեան *), բանաստեղծ մը, աւա՞ղ, որ և այնքան պիտի ներգործէր իմ կեանքիս վրայ ալ»... Այսպէս է գրում Միթհատ փաշայի հռչակաւոր գործակիցը 1879-ին հրատարակած Ռոսսինեանի Փիլիսոփայութեան դասագրքի իր հակըրճ նոխաբանում:

Բանաստեղծ էր Նիկողայոս Պալեանը, նալոր համարում է 1863-ի մեր Ազգային Սահմանադրութեան գլխաւոր նախադրիչ (promoteur)... «Ինքն իսկ էր աւելն և յափշտակութիւն»... ասում է նրա մասին Գրիգոր Օտեան, նոյն նախաբանի մէջ:

Բանաստեղծ էր Նահապետ Ռուսինեանը — Պալեանի սիրած և անբաժան ընկերը, որի հետ միասին երկար գիշերներ որոճել էին Պարիզում իրենց նւիրական ու հայրենական ծրագիրները:

Մինը, Պալեան, հետևում էր Էդգար քինէին, միւսը՝ Ռուսինեան՝ Վիկտօր Կուլէշին: Աւարտելով իրենց մասնաձիւղը և իւրացնելով 48 թւականի աւետարանը՝ երկու ընկերները որոշում են ի գործ դնել այն՝ ազգային կեանքում:

«Ընդունայն ճգնի մարդ ճողոպրել ազգին ազդեցութեանէն» — ասում է իրաւամբ Օտեան, «եւ ազգը՝ առաջին բառն էր, զոր արտասանեցին Պալեան ու Ռուսինեան, երբ միացան սոյն տողերս գրողին հետ»... 1849-ին (մի այլ վկայութեամբ՝ 1851-ին) Նահապետ Ռուսինեան, իբրև արդէն բժշկապետ, վերադառնում է Պօլիս, հաստատւում է իսկիւտար, Օտեանի և այլ ընկերների հետ — և սկսում է Սահմանադրութեան մայրխմբակի գործունէութիւնը:

«Այն օրերուն՝ Ազգը վարչութեան պէս բան սը ունէր, լեզուի պէս բան մը, դպրոցի պէս բան մը» (Օտեան):

Երեք-չորս երիտասարդները ձեռնարկում են կերպարանաւորելու այդ երեք «բաները», որ էական պայմաններն են ազգային առաջադիմութեան: Իւ այդ ձեռնարկից պիտի ծնէր Ազգային Սահմանադրութիւնը **):

*) Լամարտինի մասին է խօսքը:

**) Անշուշտ, մէկ կամ երկու հայրենասէրների գործ չէր այդ ահագին ձեռնարկը և նրա իրադրութիւնը՝ այն ժամանակայն պայմաններում: Կեանքի, մտնաւորապէս թիւրքիոյ քաղաքական կեանքի պայմանները, Եւրոպայի միջամտութեան յարատեւ ապառնայիքը, քրիստոնեայ հպատակների գոհացում տալու յարաճուն անհրաժեշտութիւնը — այդ բոլորը դիւրացնում էր հայկական երազների մասնակի իրականացումը: Բայց և, անշուշտ, անհատները, իրենց կորովի նախաձեռնութեամբ, իրենց յամառ հետապնդումով մեծապէս զարկ են տւել նոյն երազների իրականացման: Այդ անհատների շարքում են նաև Յակոբիկ Կրճիկեան, Դօքտօր Սերվիշեան, որոնք նոյնպէս 40-ական թւական

Հատ աքնեցին, տանջեցին. շատ պայքարներ մղեցին... Օտեան ասումը մեղամարդն էր (1879-ին)։

«Երբ այնքան տարիներէ ետքը մտքովս կը յաճիմ այն ժամանակներուն մէջ, որ լաւ պատերազմը պատերազմեցանք, լուսոյ՝ խաւարի դէմ, ժողովրդականութեան՝ ամիրայութեան դէմ և սահմանադրութեան՝ եկեղեցական ու աշխարհական իշխանութեանց դէմ, երբ աչքիս առջև կը բերեմ այնքան խորհրդանշան, այնքան սպառնալիքներ, այնքան ահ ու դողը, այնքան վտանգը, որոյ մէջէն անցանք... զարմանքը կը պատէ և կ'ըսեմ. ի՞նչ վեհ է երիտասարդութիւնը...»

Կենսագրողները հազազհա են, եղածներն էլ՝ խիստ ժլատ—և քառասնական թւերի մեր այդ պատական երիտասարդութեան կեանքն ու գործը մնում են տակաւին չլուսաբանւած։

Օտեան համեմատում է պարիզեան խմբի երկու մեծագոյն դէմքերը—Պալեանը և Ռուսինեան—և գրտնում է երկուսի միջև անվերածելի ներհակութիւն։

Նիկողայոս Պալեանը ինքն էր աւելն ու յափշտակութիւն, մինչդեռ Ռուսինեան անխռով խորհրդածութիւն էր... Մին անսայթաք ընթանար գիծերով շրջապատեալ, միւսը

ներին, թերեւս անկախ մեր յիշատակած անհատներից, յղացել են նոյն ծրագիրները, աշխատել են միեւնոյն ուղղութեամբ։ Թւում է, սակայն, թէ հայրենասէրների այդ գեղեցիկ շարանի մէջ կենտրոնական դէմքն է Նիկողայոս Պալեանը, որ իր կարող ազդեցութեամբ, իբրև պալատի ծարտարապետ, ամենից աւելի էր նպաստել Սահմանադրութեան խաղաղ նւաճման և որ մեռել էր վաղաժամ, նախ քան իր երազն իրագործելու... Համեմատ մարդու կտաւարած դերը մնացել էր բոլորին քննադատ. բոլորն էլ մոռցել էին նրան։ Բոլորը... բացի իր սիրեցեալ և անբաժան Ռուսինեանից, որ նոյնպէս տոտնեակ տարիներ պահել էր այդ իրողութիւնը սրտի խորքում, իբրև ներկայի մի գաղտնիք և միայն 1870 թւին, Ազգային ժողովի 4 գեկտեմբերի նիստի մէջ, մի աննշան միջադէպից (Յակոբ Պալեանի հրաժարականից) ցնցւած, արտաւերելով բաց է անում հայութեան առջև այդ կարևոր գաղտնիքը, պատմում է հեծկլաւով իր յուշերը պաշտելի ընկերոջ, Նիկողայոս Պալեանի մասին, պատմում է, թէ ինչպէս է նա աշխատել Սահմանադրութիւնը նւաճելու համար, թէ ինչպէս են 40-ական թւականներից համախմբել նրա շուրջը ուրիշ դէմքեր, երբեմնի ուսանողներ, Օտեան, Աղաթօն և ինքը... Ռուսինեան յիշում է, վերջապէս, իր ընկերոջ վաղաժամ ու դժբախտ վախճանը և այդտեղ, ճառի վերջում, նրա կոկորդը սեղմում է, ձայնը հատնում յուշերի, զգացումների ուժգին յորձանքից, հոնտորը թողնում է ամբողջը և հեկեկալով դուրս է նետւում սրահից... Տեսարանը վերին առաքանի յուզիչ է, ամբողջ ժողովը պահպանում է խորին, կրօնական լուռութիւն, տասնեւեւ այդ սրտառուչ ճառից և այդ տխուր ու անակնկալ յայտնութիւնից...

Ազգային ժողովի քարտուղարը արձանագրում է.

(Աստուտ արաւարտութեան ի ժողովն և լուսնիկից)։

Տես «Ատենագրութիւնը Ազգային ժողովի» (պաշտօնական հրատ. Ազգ. Պատրիարքարանի)։

խոյանար տատանեալ ի փոթորկաց և ի շանթիցն հարւածեալ՝ երևակայութեան բացած սփռւներուն մէջ...»

Համեմատութեան եզրակացութիւնը թւում է փոքր ինչ բռնազբօսիկ. Ռուսինեանը, որ ներկայացւում է իբրև «անխռով խորհրդածութիւն» և հակոտնեայ Պալեանի— ոչ պակաս աւելնոտ էր, յափշտակող, վառվռուն ու թռթռուն։ Այդ կողմից նա թերեւս կը գերազանցէր բոլոր միւսներին։ Զգացմունքի տիրապետութեան տակ նա երբեմն հասնում էր բորբոքման ու պափօսի գազաթնակէտին և գործում էր անօրմալ, հիւանդագին թռիչքներով։

Այդ տաղանդաւոր կեսարացին *), անտարակոյս, հայ մտաւորական բոլորի ամենաօրիժիշակ դէմքն էր և գուցէ միանգամայն ամենացայտուն ու ամենահարուստ ներկայացուցիչը, այն տիպարի, որ քիչ առաջ յատկանշեցինք։ Նա մարմնացած լիրիզմ է և սքանչելի հոնտոր։ Մի հմայիչ լեզու և մի հազազհա պերճախօսութիւն... Ընտիր, նուրբ, բարձրասլաց և ներդաշնակ։ Առանց շինծու ժեստերի և գոեհիկ ճոռոմաբանութեան։ Հայոց փոքրիկ պարլամենտի զարդն էր, Ազգային ժողովի «սոխակ-բեմբասաց»։ Լսում էին յայդ սոխակին սիրով ու զմայլումով։ Երբեմն, շղթայազերծ լինելով պէս դուրս էր նետւում իր հունից, զգացումները յորդանում էին, համակում նրա բովանդակ էութիւնը, նա ճառում էր և հեկեկում, լալիս էր և լացացնում...

Այդպէս էր Ռուսինեանը։ Բժիշկ էր և բանաստեղծ, ճարտասան էր և լեզագէտ, փիլիսոփայ էր և հասարակական գործիչ, — ամեն բանով զբաղւում էր, ամեն տեղ զարնւում էր նրա անխոնջ, մրկեալ ու որոնող հոգին։ Կեանքի բոլոր աշխարհներում ստանձնել էր ուժօրմատօրի, վերանորոգչի պաշտօն և անդադար յղանում էր պրօֆէսոր, ծրագիրներով։

Սակայն... ուսուպիստի ծրագիրներն էին—գաղապարտւած մեռնելու։ Բանաստեղծ - ուժօրմատօրի ցնորքներ էին, որ չէին կարող շոշափելի հեաքեր թողնել սերունդների գիտակցութեան մէջ։ Որովհետեւ, իր փայլուն ու բազմակողմանի ընդունակութիւնների հետ՝ Ռուսինեանն ունէր մեր յառկանշած տիպարի անխուսափելի գծերը... Նա աւելի բանաստեղծ էր, քան մտածող։ Աւելի յօրինող՝ քան գործադրող։ Աւելի փայլուն՝ քան խորունկ։ Ոչ ներհուն բաղաբազէտ էր, ինչպէս ոմանք կը պնդեն, ոչ էլ բաղաբական գործիչ։

Եթէ նա ծնւած ինէր եւրոպական միջավայրում, — կը լինէր իբրև գրագէտ կամ բանաստեղծ մի Հիւզօ, մի Լամարտին, և իբրև քաղաքագէտ — մի Թիէռ, մի Կամբետտա...

Այսպէս է ասում Ռուսինեանի նորագոյն կենսագրողներից մինը. Բժ. Թորգ, «Հանդէս Ամսօրեայ» ի իր շահեկան յօդւածաշարքում **):

*) Ծն. 1819 թ.—վախճ. 1876 թ.։

**) «Հանդէս Ամսօր.» 1902—903 թ.։

Արդար լինենք մեր սիրելի հանգուցեալների պնակ-
հատման մէջ և անօգուտ չափազանցութիւններով չնաե-
մացնենք նրանց յիշատակը:

Գամբետտա չէր կարող լինել Ռուսինեանը—ոչ իսկ
արեւմտեան միջավայրում—քանի որ չունէր պահանջաւոր
արիւթութիւնն ու համարձակութիւնը: Մի բռնաւոր նարատ
կաշկանդել էր նրա բարձր, ազատատենչ հոգին, անգաւ
մայուծել էր ազգային վերածնութեան նրա թռիչքը: Նա
տառապում էր իր ցեղին, աւելի ճիշտ միջավայրին
յատուկ մտաւ խոսեցաւ, աւելի ճիշտ՝ երկ-
չոտութեամբ:

Ամուր գրկած Ֆրանսիական Յեղափոխութեան նշա-
նաբանները, երկար տարիներ նրանց երազած ու գուր-
գուրած՝ նա, սակայն, դողում էր, երբ նոյն այդ նշա-
նաբանների անունով փորձում էին հայրենի միջավայ-
րում բիւթ չատ համարձակ քայլեր անել: Ֆրանսիա-
կան գաղափարները այն աստիճան վառել էին նրա
զգայուն սիրտը, Ռոբեսպիէի և Դանտոնի պաշտամունքը
այն աստիճան գերել էր նրա ամբողջ էութիւնը, որ
նա դեռ ուսանողութեան տարիներում յօրինել էր նոր
հայկական տարեցոյց, անւանելով ամիսները Ֆրան-
սիական Յեղափոխութեան ընդունած անուններով,
թարգմանելով:

Germinal — Floral — Prairial — Thermidor
Բուսին — Դաղկին — Մարգին — Տօթար
(Ապրիլ — Մայիս — Յունիս — Օգոստոս)
Fructidor — Brumaire
Պտղար — Միգոն
(Սեպտեմբեր — Պեկտեմբեր):

Սակայն, այդ բոլորը լոկ թէօրիկ զառանցանքներ էին—
սիրուն, մակերեսային ու զւարճալի բառախաղ: Յեղափո-
խութեան գաղափարը հանգիպել էր հայկական կրաւորա-
կանութեան գրանիտեայ քապառաժին: Ռուսինեանը ան-
դադար դուրս էր կոչում ուրուականներ և ինքն իսկ սար-
սափահար փախչում էր այդ ուրուականներից. նա պաշ-
տում էր Յեղափոխութիւնը, բայց և, անշուշտ, զար-
հուրում նրա նիւթած արեան թափօրներից, նա կուզէր
իր սեփական հայրենիքի ազատութիւն, — առանց, սա-
կայն մի կաթիլ արիւնի: Նա երկնել էր իր ընկերնե-
րով հայկական Սահմանադրութիւն, բայց զբաղաբական
բառն իսկ նա կուզէր դուրս վտարել ազգային շրջան-
ներից...

Եւ Ազգային Ժողովի «սոխակ-բեմասացը» սովորա-
բար նստում էր լուռ ու մունջ ազգի մեծ, հանգիստ-
ւոր վարկեաններին, երբ գաւառացի հայութեան աղիո-
ղում հեծեծանքը գալիս էր փոթորկելու Ղալաթայի
անշուք խորհրդարանը... Երբեք, անգամ 70-ական
թւականների տենդային օրերի մէջ, Խրիմեանի պատրիար-
քութեան տագնապալի շրջանում, «կարմիր Ցարեցոյցի»
հեղինակը դուրս չ'ելաւ իր ակամայ պապանձումից,

չ'արձագանքեց օրհասցեկան ճիւղերին, չ'միացրեց իր պերճ
լեզուի շանթերը հպարտալիք բողոքին: Նրա սիրտը
խռովում էր ժողովրդային տագնապով, բայց նա դէմ
էր բողոքներին, նա կեկուում էր բռնապետութեան
ստւերի հանդէպ, սարսափում էր հնարաւոր պաթիթ-
ներից, գերագասում էր իր լքած ու վիրաւոր ժողո-
վրդի պէս հեծեծալ ու համբերել և կամացուկ երգել
իր յօրինած սրտառուչ տաղը.

Երբ որ բացւին դռներն յուսոյ
Եւ մեր երկրէն փախ տայ ձմեռ,
Չբնաղ երկիրն մեր Արմենիոյ
Երբ փայլէ իւր քաղցրիկ օդեր.
Երբ որ ծիծառն ի բոյն դառնայ,
Երբ որ ծառերն հագնին տերեւ,
Ցանկամ տեսնել զիմ կիլիկիա,
Աշխարհ, որ ինձ ետուր արեւ...

Ամբողջ սերունդներ կրթւեցին այդ տաղով:
Խեղճ Ռուսինեան: Մեռաւ, այդ երգը մրմնջալով,
հրաժեշտ տւեց աշխարհին ձմրան ահեղ սառնամանիք-
ների մէջ, ուր ծիծառն ու ծառերը սեւ էին հագել
ամենուրեք, ուր հայրենիքը տնքում էր ամենածանր
օրհասի տակ, ուր իր առջև փակւած էին «յոյսի»
բոլոր գոնները...

Վերագառնանք դարձեալ քառասնական թւականներին:
Կեանքի անիւը առաջ էր մղում գանդաղ, անշմա-
րելի թաւալումներով: Եւ մամուլը, այդ կեանքի
աղօտ ոչ դալուկ արտայայտիչը, սկսում էր կամաց-
կամաց ոգի առնել և բառառել օրինաւոր, մարդկային
բառառուով: Իրօք կարծես չկար իսկ նրա գլխին բռնա-
պետութեան խարազանը: Հայ մամուլը ազատ չէր, բայց
ցենզորի ճանկերում էլ չէր: Այդտեղ ևս իշխող տարրը
ցուցահանում էր իր արհամարհոտ համբե-
րողութիւնը, ինչպէս բոլոր միւս ազգային հաս-
տատութիւնների վերաբերմամբ — դպրոցի, եկեղեցու
և այլն: Սակայն, երկիւղը սարսափելի ու համաճա-
րակ պատուհասի պէս, կաշկանդել էր հայ գրողի միտքն
ու հոգին. երկիւղը՝ ազատ խօսքի գործածութեան և
նրա հետ կապած վառնգների ու հարւածների հան-
դէպ, նոյն երկիւղը՝ որ անդամալուծել էր Ռուսինեան-
ների հայրենակարօտ ոգին, հայրենավրէժ կամքը...

Այնուամենայնիւ, հայ առաջին խմբագիրները խի-
զախում էին իրենց համեստ հրատարակութիւնների մէջ
ազգային-հասարակական մի քանի խնդիրներ դնել ու
արծարծել և մի քանի յորդոր ու հրահանգներ ար-
ձակել: Մերթ ընդ մերթ Կ. Պոլսի, Ջմիւռնիայի հայ-
կական հրապարակագրութիւնը համարձակ թափ էր
առնում, ասես իսպառ ազատագրւած բռնաւոր հսկո-
ղութիւնից: Մերթ ընդ մերթ ազգի ու հայրենիքի
մարտաշունչ նշանաբանները հնչում էին բարձրաձայն:

նեղիքս ու անապարտս, ասես այն տխուր գիտակցութեամբ՝ որ ազատութեան այդ շրջանը վաղանցուկ էր էֆեմեր, պատահական, որ նա շուտով պիտի տեղի տայ մտասպան և մարդասպան խաւարին...

Իւրաքանչիւրը հպարտ է իր ազգով — գրում է «Հայաստան» թերթը 1846 թվին — որը՝ իր հարստութեամբ, որը՝ իր հին գիտունութեամբ, որը՝ իր հարստութեամբ, ամեն մի ազգ իրաւունք ունի պարծենալու իր այս կամ այն յատկութեամբ... Վասն զի նախախնամութիւնը ամեն ազգի մէջ մէկ յատուկ ձիւրը պարգեւ է... Մեր ազգը պարծենալու բան մը չունի՞ մի... Հայկին օրէն մինչև աս օրս հայ անունով մնայլք թի՛չ ազնւականութիւն կը համարուի իրեն. ահա ասով թող պարծի։ Մինչև հիմա հայար հազար մարդիկ երևան գիւղեր, անսր զարհուրելի ալիքներուն դէմ մաքառելի իրեն. ահա ասով թող պարծի... Հիմա ալ գեռ աշխարհքիս վրայ շատ ազգեր խորին բնի մէջ... իրեն արթնալով, ուսման յառաջագիմութեան համար այսչափ ընկերութիւններ, դպրոցներ հաստատելը թի՛չ իմաստութիւն կը համարուի իրեն. ահա ասոնցմով թող պարծի... Ուրեմն... դո՛ւն, որ միշտ յառաջ երթալուն վրայ ես նէ, մի՞ յուսահատիք, մի՞ վհատիք, հապա յուսա՛, արիացիր և մի՛ ամաչիր Հայ եմ բռնելու...»

Եւ ապա թերթը դառնապէս գանգատում է հայոց օտարամոլութեան առթիւ... «Ուստիս — ռուսներէն կը խօսին, Պարսկաստան — պարսկներէն, Թիւրքիս — տաճկներէն... Ծանուցանում է վտանգը և մխիթարում... որ 5 — 6 տարիէ ի վեր, շնորհիւ մի բուն Հայ մտաւորականներու, վարժարաններ կը հիմնուին և հայ աշակերտները հայերէն գրել-կարդալ ու խօսիլ սորվեցնելու կ'աշխատին» *):

Մի ճառի մէջ, զեանդած նոյն թերթի 1846 թ. 3 օգոստոսի համարում, — մի խանդավառ ներքող ուսման ու գիտութեան հասցէին... Դրանց մէջ է ազգի փրկութիւնը.

«Արթնցիր, Հայոց Ազգ, այս մահահրաւէր տգիտութեան թմբուկներէն, միտքդ բեր առաջին ունեցած փառքդ, որքա՛ հիմակաւն թշուառութեան վիճակդ, ուրիշ լուսաւորիչ ազգերէն օրինակ առ... Դպրատուները պայծառ պահելու ջանք բրէ, հայկական լեզուն ազգի մշակէ, օգտակար լեզուներ և աղատական գիտութիւններ ուսանելու հետեւէ... ասոնցմով միայն կարող կըլլաս երջանկութեան վախճանը հասնիլ...»

Գիտութիւնը — գերագոյն դարմանը, ցգիտութիւնն էր, որ քանդեց Հայաստանի տունը.

«Ի՛նչ բրաւ հայոց տունն աւրող արիւնխիւսն՝ տգիտութիւնը... Բաւական եղաւ, Հայաստան աշխարհ, բաւական եղաւ այն անգութ բռնաւորին խորիտ լուծին տակը շարաշար բաշած պանտխտութիւննիս, արթնցիր, բո՛ց գրկասուն սիրտդ, ժողովէ ցիր ու ցան եղած զաւակները. ահա՛ բախտիդ նշոյլը ծագող բարեպատեհ ժամ. ահա՛ զուարճալի օրեր գուշակող պանջնի գարնան դուռները, հալեցո՛ւր այն աստուածային հրովր երկնաբեր լեռներուդ վրայէն պնդադեալ սառնամանիքը. կանանչագեղ զարդարէ բնութեան այն հրաշալի գետերէն ջուր խնող դաշտերդ... (14 դեկտ. 1846)»

Առաջին թոթովանքներն են հայրենասիրական հրապակագրութեան, առաջին ուժեղ յորդորները՝ գէպի ազգային ինքնաճանաչութիւնը.

*) «Հայաստան», 27 յուլիս 1846 թ.

Իսկ ի՛նչ է «հայրենիք».

«Այն տեղը, ուր սր մէկը աշխարհը կուգայ, ուր կայ իր նախնեացը նշխարներն ու դամբարանները. և այդ նախնեաց նահատակութիւններուն և ուրիշ բրած գործերուն յիշատակարանները» (Հայաստան, 19 հոկտ. 1846)։

Ի՛նչ է անհատի պարտականութիւնը առ հայրենիք.

«Պէտք է, որ մարդ գիտնայ ազգին համար իր շահը ժողովրդի, իր ինչքը, ստացածքը, իր կեանքն անդամ ազգին ազնկութեանը և պատուին նւիրել...»

Սակայն... «մարդ իրաւունք չունի ազգին ազնկութեանը համար գէշութիւն մը բնելու կամ ուրիշի մը իրաւունքին դպչելու...»

Այս վերջին յայտարարութիւնը — ժամանակակից ինտերնացիոնալիզմի, միջազգայնութեան ոգով — մի սոսկ պատահար է, accident, որ գուցէ ակամայ դուրս է թռել հայ խմբագրի գրչի տակից, և որ յաճախ չի կրկնում այնուհետեւ թիւրքահայոց մամուլի մէջ.

Դրա հակառակ՝ աստիճանաբար և crescendo շեշտւում է կորովի, երբեմն նոյնիսկ տարամբով, յարձակողական ազգասիրութիւնը — որ միանգամայն բնական է ազգային էությունից այն նախնական հանգրաւում — բազմանում են հայրենասիրական խանդավառող յորդորները, հոլովում է հարիւրաւոր ձեւերով այն մեծ, վերացական գաղափարը, որ դարձաւ այնուհետեւ ամեն մի թիւրքահայի նւիրական սրբութիւն, որի անունով երգում է նա և այսօր.

— Ա. Զ. Գ. Բ.

Ճառերը — միշտ աւելի պաթետիկ, յորդորները — միշտ աւելի մղեցնող ու ուղմաշունչ, Հեազհետէ դուրս են կոչում՝ Արամեների ու Թորգոմների սաւերները, խօսում են «հայկական մեծագործ ոգւոյն բնատուր ձիւրի» մասին, յիշում են Իղիշէներին, Անյաղթներին, յիշում են «մարդկային ազգի խանձարուր Հայաստան աշխարհ»... Մի թիւրքահայ ճամբորդ, վերադառնալով Անիի աւերակներից՝ ողբ է կարդում և հրաւիրում իր հայրենակիցներին՝ վրէժ խնդրութեան (մասնաւորապէս, հայրենիքի ներքին թշնամիների դէմ)...

«Ո՛ր, ազնիւ հայոց ազգ, քաջապէս խորհէ վրէժ առնելու եղանակդ... Որչափ սոսկալի պատիժ տաւ նէ, արժանի է... Որդոց որդի, կտակաւ աւանդէ մինչև յաւիտեան զանոնք խայտառակել և պատժել և վրէժ պահանջել...»

«Հայաստան աշխարհ» իր ամեն փառքերէն զրկւած, իր մեծութիւնները կորսնցուցած, երկիրները կողոպտւած, իրեն բարձր Արարատեան գլուխը տրոմուկեան մութ ու խաւար քողով ծածկւած...»

Ահա և մի խանդավառ յուշ ու ներքող՝ «Տանն Արշակունեաց».

«Ո՛վ քաղցր անուն, Հայաստանայց անցաւոր մեծագործութեանց հիմնագիր... բու փառքը ո՛վ կրնայ պատմել, ո՛ր են բու զաւկներդ, ո՛ր է բու անուանակիր ժողովուրդը քեզմէ մնացած... ո՛վ մնացորդը տանն Արշակունեաց» *).

*) «Հայաստան», 14 փետր. 1849.

Մի յորդառատ լիրիզմ և մի ջերմ, կարօտակեղ հայրենասիրութիւն, որ յիշեցնում են Լեօպարդիի սքանչելի առղերը *).

*O, patria mia!... Dove la forza antica?
Dove l'armi e il valore e la costanza?
Chi ti discinse il brando?
Chi ti tradì?... Dove cadesti o quando
Da tanta altezza in così basso loco?...*

Բայց ահա հայկական ազատասէր հայրենասիրութեան ձայնը հնչում է նոյնիսկ Լեօպարդիի հայրենիքից... Համաւերոպական յեղափոխութեան հզօր արձագանքը հասնում է Վենետիկ, փոթորկում է Ս. Ղազարի չնաշխարհիկ անգործութիւնը և մենաւոր խուցերից դուրս է կոչում երիտասարդ լաւերային—ամենից զգայուն և ամենից բանաստեղծ—որ սկսում է անհանգիստ ականջ դնել Արեւմուտքից ու Հիւսիսից տեղացող բոմբիւններին և ապա բանաստեղծական ու ռազմական մի վսեմ յափշտակութեան մէջ առնում է քնարը, ուղղում իր վեհափառ և բոցավառ նայածքը դէպի հեռու Արեւելք, դէպի ստրուկ, բազմաչարչար հայրենիքը և երգում.

Ե՛հ, «Թափեաց, «Թափեաց աղէ զարթիր,
յո՛ւշ, յո՛ւշ քեզ Հայաստան,
...
Նոր ժողովուրդք ի վեր ի վեր ելցեն, իջցեն գու վայրկայր
Նորա տիրոք ազատացեալք, դու հէգ ծառայ, ստրուկ, գերի,
Աշխարհ ամեն հրճեալ, դու յանձնիթար
Համակեալ սուգ **).

Հայր Ալիշանն էր, հայոց սիրեցեալ Նահապետը:

Ապստամբութեան ալիքը տարածւում է դէպի հարաւ, ողողում է Իտալիան, սպառնում է Վենետիկին... Ռուսները որոտում են և մարտի գօռ աղաղակը թնդացնում է հինաւուրց հանրապետութեան շքեղ ապարանքները: Հայր Ալիշան ականատես է այդ բոլորին, նրա դիւրավառ սիրտը ցնցւում է և հրդեհւում, նա փչում է իր սրինգը և հնչեցնում իր աննման ռազմերգի որոտընդոստ բոմբիւնները (1849 թ.)...

Հապ՛ օ՛ն ի գէն, գունդագունդ
Հեռեալ ի պար թունդ ի թունդ
Ի գէն ի վրէժ օ՛ն անդր յառաջ
Ի գէն ի վրէժ, մի ձախ մի յաջ...

Հայաստանի անմխիթար զաւակի վշտաբեկ կուրծքն է, որ գոռում է, մռնչում և գունդագունդ ի գէն, ի վրէժ հրաւիրում «հայրենավրէժ հայկազունները», «արի արանց մանկունքը»...

Ահա և Մեծ ու Փոքր Մասիսի յուզիչ դեաւօգը (երկնօտութիւն)—մի հոյակապ յղացում, կառարած

*) Leopardi: *All'Italia*, (1818 թ.)

**) «Բանք Ասորմայ Պահլաւունոյ» ոտանաւորից, գրւած 1848-ին, փետրւարեան յեղափոխութիւնների անմիջական ազդեցութեան տակ:

նոյն վենետիկեան անցքերի ազդեցութեան տակ, (1849 թ. մարտ 2).

Աւագ Մասիսը—գոռող, ահեղ և յանդուգն, վառ-լած հրաբխային, աշխարհաւեր տրամադրութեամբ. Փոքր Մասիսը—երկչոտ, հեգնող ու յոռետես, միանգամայն յուսահատած Հայաստանի ապագայի վերաբերմամբ: Աւագ Մասիսը ինքը Ալիշանն է, ապստամբութեան գաղափարի խորհրդանշը և նրա մոլեգին արծարծողը, որ պատրաստ է խորտակելու ամենահաւոր խոչընդոտները և վերագարձնելու հայրենիքին կորսւած փառքը... Նա գալոց անխուսափելի «ցնցումների» գուշակն է, խորաթափանց և լաւատես մարգարէն... Փոքր Մասիսը հակայեղափոխական տրամաբանութեան թարգմանն է, ստրկութեան և անշարժութեան պատգամախօսը, որ ի վերջոյ ընկճւում է, յետ նահանջում աւագ եղբօր որոտածայն, անդիմադրելի շանթերի առջև.

Ինձ մտիկ արէք, լերունք դուք հաւասար,
Ես Արարատեան եմ Աւագ Մասիս
Ազնիւ բան դամեն լերունք աշխարհիս...

Եւ ցոյց է տալիս իր դժոխային կուրծքը, սպառնում է կրակ ու բոց ժայթքել, հեղեղել ամբողջ շրջապատը, «սասանեցնել զԱրարատն Հայոց» և վա՛յ է գոռում, ով դէմ կը կանգնի...

Կրտսեր եղբայրը հեգնում է այդ ոլիմպեան յոխորտանքը, հասկացնելով, որ ամեն ինչ վերջացած է, որ Մասիս հսկայ և չքնաղ բուրգը սոսկ մեռելութեան մի յուշարձան է...

Չեմ, չեմ այլ փառաց ու բաղդի նշան,
Այլ մեռելութեան հայոց մահարձան.
Գան դընան դառնան ալիք գետերուն
Չի դառնար որդոց՝ պարծանք հայրերուն:

Աւագ Մասիսը.

Մի՛ այդպէս մտիկ, Մարուկ, մի՛ այդպէս.
Մի՛թէ բան զԱւագ դու լաւ կը տեսնես.
Ես իրք կը տեսնեմ բանց քեզ առաւել,
Յերեսէն Հայոց փառքն չէ կտրել:

Բայց... դու դուրսը ձիւն է, ներսը՝ պաղուկ քար՝ — առարկում է Սարուկը:

Ով խոր կու նայի, թող պինդ խոր մտնու...

Պատասխանում է աւագ եղբայրը և յիշեցնում է իր հիւսիսային ծագումը.

Գիտես թէ մարած է զինչ հին կանթեղ
Բայց թէ տամ քըչիկ մի բուլբուրդի դեղ՝
Յանկոկած դաշտերդ ամեն ի մոտ գայ,
Դու այլ հետ լերանց դողաս զինչ տըղայ...
Թէ ուզենամ նոր կանգնեմ ես ստրեր,
յԱրագած դեսպան զրկեմ բարկ բարեր...

Ահա և ազատութեան կուռքի վերջին խորհրդաւոր ազդարարութիւնը.

Ինձ մտիք արէք լերունք դուք հաւասար...
Երբ յետ դարերու առաջին անգամ
Ես Աւագ Մասիս ներսուց որոտում,

կանչեմ ու շնչեմ, արձակեմ ծուխ բոց
Սասանեցընեմ զԱրարատն Հայոց
Այս բլրի նշան հայոց աշխարհին,
Թե՛ գայ ժամանակ, որ գան փառքն այլ հին...

Այդպէս էր սրտում հայոց ապստամբութեան խի-
զախ երգիչը: Ոչ որ, գուցէ ոչ մէկը հայ բանաստեղծ-
ներից այնքան յուզիչ շնչաբերով չի լացել հայրենիքի
աւերակները, նրա մարած փառքերը, և ոչ որ այնքան
ուժով ու մոլեգնութեամբ, այնքան սուրբ, անկեղծ
ոգևորութեամբ չի հնչեցրել այդ փառքերի յաղթական
բամբը...

«Աւարայրի բլրուլը», մեր պատմութեան գեղեցիկ
դրագնների երգիչը, մեր սարերի ու ձորերի ոլիմպիա-
կան սրբաֆառը իր սրբազան խանդավառութեամբ
կեանք ներշնչեց այդ սարերին ու ձորերին, այդ թփե-
րին, աւերակներին և իր սրտառու ձայնով — մերթ
յուսահատ և լալկան, մերթ զւարթ ու մոլեգին —
լացացրեց ու ոգևորեց սերունդներին, յոյս ու խրա-
խոյս ներշնչեց վիթխարի փլատակների հանդէպ, դուրս
կոչեց այդ փլատակներից Հայաստանի ոգին, արծարծեց
հայրենիքի և ազատութեան պաշտամունքը և ձգտեց
յաղթահարել վախի, յոռետեսութեան ազգադաւ հո-
սանքը, երգելով բարձրաձայն, ինքնավստահ.

Հայոց աշխարհիկ, գարունդ է հասել,
Ահա գեղեցիկ գարուն քս եկել...

Ինչպէ՛ս պիտի ցաւէր, կսկըծար այդ ազնիւ, գեր-
զգայուն սիրտը 1895 — 96 թւականներին, երբ Զու-
լումի համայնաժինը արհաւիրքում խաւարել էին ազա-
տարար «գարունի» վարդագոյն արշալոյսները...

Դառն էր, անտարակոյս, Հայոց Նահապետի յուսա-
խաբութիւնը: Ի՞նչ արած... Հայր Ալիշանը այնուամե-
նայնիւ, չէր կարող նգովել հ ա յ կ ա կ ա ն ը մ բ ո ս -
տ ա ց ու մ ը, որ ինքն էր կոչել այնքան խանդադին ու
պաղատագին, որ ինքն էր նւիրագործել իր հոյաշունչ
սթափեցուցիչ բնարով, իր գոռ մունչիւններով... Այդ
ըմբոստացումը, այնուամենայնիւ, մնում է անպարտ՝ թէ
խղճի, թէ մտքի առաջ, նա մնում է բնական և բանա-
կան իր ծագման ու զարգացման մէջ, ինչպէս որ բնա-
կան էր Ֆրանսիական Մեծ Յեղափոխութիւնը, չնայած
Ռոբեսպիէռեան Ցերբորի խօսկան արհաւիրքներին,
արեան հսկայ շատրուաններին, հաղարաւոր անմեղների
գլխատումներին և, ի վերջոյ, յաղթանակող ռեակցիային...

Եթէ կայ հայ յեղափոխականի մեղսակցութիւնը Հայ-
կական Զուլումի մէջ, ապա Ալիշան և Խրիմեան — եր-
կուսն էլ ընդգլցումի և ազատութեան հոյատիպ շփո-
րոշներ — բաժանում են այդ «մեղսակցութիւնը», բա-
ժանում են ըմբոստացման հետ և անքի պատասխա-
նատութիւնը՝ Հայ Յեղափ. Դաշնակցութեան հետ,
Հնչակեան կուսակցութեան հետ, Արմենական կուսակ-
ցութեան հետ:

Եւ... կարծելու տեղիք չունին այդ պաշտելի դէմքերը
նրանք կատարել են իրենց պարտքը ժողովրդային ծո-
վածաւալ տառապանքի ու վշտի հանդէպ, կատարել են
այն ձեով, ինչ ձեով թելագորել է իրենց խիղճը և հա-
մաշխարհային պատմութեան ձայնը:

Մ. ՎԱՐԱՆՅԱՆ

Թ Ե Ր Թ Օ Ն

Ա Ի Ե Ր Ա Կ Ն Ե Ր Ի Ժ Պ Ի Տ Ը

(ՃԱՄԱՌԻ ՅՈՒՇԵՐ)

Աշնանային չքնաղ երեկոյ է, անուշ ու երազուն.
լոյսերի, գոյների, կիսաստեղների մի երեկոյ, երբ մարդ
լսում է հանգեղ բնութեան մեղմ հեքը և թօշնոդ
խոտ ու տերեւի տարտամ մրմունջը:

Առջևս փուլած է մի ծով հարթութիւն. Խաղաղան
լեռնաշղթան և կարմիր բլուրների բմահաճ շարաններ
փակում են հորիզոնը, ուր ցոլքերի, երանգների մի
անծայրածիր, բիւրածալ շղարշ՝ թրթռում է, բացում
ու կծկում, եռում ու փուլում: Դքեղ ու բեղուն դաշտը
թախծոտ՝ որպէս այրի հարս, հեռուն փարում է հո-
րիզոնին, լեռներին, բլուրներին:

Թիկունքիս վարդահան գիւղն է *), շուրջս հին-հին
գերեզմաններ ու աւերակներ:

Բազմաթիւ աւեր եկեղեցիներ փուլած են հարթու-
թեան վրայ, որը տակաւին կանգուն՝ իր մի հատիկ
կամարին յուսահատ ճիգով յենած՝ վերահաս ու ան-
խուսափելի անկումի սարսափը ճակտին, որը ընկած մի
կողքի, պարտած հսկայի պէս և գլուխը վար դրած
հողերի մէջ, այլ ևս երբեք չբարձրացնելու համար,
ուրիշները անձեւ, այլանդակ քարակոյտ, շարունակում
են սակայն երկնքի ճակտին ցցել մի սիւն, պատի մի
կտոր, որպէս ցասումի կարկառուն բազուկներ. կան և
այնպիսիները, որոնք իսպառ հողին հաւասարաւ, տրոր-
ւում, փոշիանում ու անհետանում են ուժեղ հովերի
անողորմ շնչով:

Արեւստի, զգացմունքի, գերագոյն հաւատի բոլոր այս
արտասւելի բեկորները լռելեայն խոկում են իրենց վի-
րաւոր, իրենց արիւնոտ ու ծանր խոհը:

Եւ աւեր եկեղեցիների շուրջը, նրանց մխացող ծո-
ցում, նրանց թեւերի տակ, փուլած են ցաք ու ցրիւ
բազմաթիւ շիրիմներ, նոսր ու խղճուկ խոտեր, նիհար,
դեղնած ծիւեր փարել են մամռապատ քարերին և կա-
մացուկ սլսլում են երեկոյան հովի թեթեւ շնչով:

Առջևս կանգնած է ծերունի նախրպանը, այս տրտում
Թուժօն, իր երկար գաւազանին յենած՝ և յամառաբար

*) Բաբերդի շրջանում Ցրապիղոն տանող ճամբու վրայ:

նայում է գետին, իր ոտների տակ ծածկեր է՝ ինչ միասին ենք և նա միշտ այդպես է։ Վեր է նայում միայն այն ժամանակ, երբ պատասխանում է հարցիս, ապա կրկին ծնօթը յենում է աջ ձեռքի գաստակին և երկուսը միասին իր գաւազանին, ու մնում է լուռ, աչքերը մի կէտի յառած։

— Ի՞նչ ես փնտրում ոտքերիդ տակ, ա՛յ ծերուկ։
 — Նա գլուխը բարձրացրեց, թաւ յօնքերի տակից վրաս թարթեց խորը աչքերը, ու հակիրճ ձևով ասաց.

— Հէ՛չ։

Ու կրկին նրա ալեգարդ գլուխը, թաւ ձերմակ մի-րուքն իջան գաւազանին։

Առաջ անցայ դէպի մի նորակառոյց շէնք, որի պերճ զանգւածը, ինչպէս մի մեղմանուշ ժպիտ փթթում է այս աւերակների ու գերեզմանների վրայ։

— Դպրոց է, ասաց թուժօն, երկու տարի կայ ամենքս էլ բար ու կիր կը կրենք... Խէրով գործ ա, ինչ կայ որ, ամա կասեմ փերիշան կէնեն անիրաւները... Ար տեսնաս էսա ժամերէ քսան երկու ժամ կայ, մեր պապերն էլ քրտինք են թափեր, բար ու կիր կրել, Աստու տուն շիներ, աղօթք արեր... Էլման փերիշան, մեր վաթանը համա փերիշան, Փայդայ չկայ... էսա երկիր փայդայ չունի։

— Թուժօ, չէ՞ հիմա ազատութիւն է։

Պատասխանի փոխարէն այս անգամ թուժօն լուռ արգահատանքով նայեց ինձ, ինչպէս նայում են անյոյս միամիտներին, ու գլուխն օրօրեց։

— Վա՛խ, խայեր, ասաց նա քիչ յետոյ, ու ես չհասկացայ, թէ ի՞նչ էր այդ բացականչութեան իմաստը։ Մտանք մի աւերակ եկեղեցի։

— Սուրբ Սարգիսն է, ասաց թուժօն այնպիսի ձևով, ասես ծանօթացնում էր ինձ առջևս կանգնած մի կենդանի մարդու հետ։

Ութանկիւնանի մի հրաշակերտ է այդ Ս. Սարգիսը. ժամանակն ու բարբարոսները կրծոտել են գեղարւեստի այդ աննման կոթողը, բայց էլի ինչ որ մնացել է, վշտախառն ու անհուն հիացմունքի աղբիւր է։

Մեր ոտնաձայներից աղաւնիները խրտնած երամով խոյս տւին և անցան դէպի միւս աւերակները։

— Աղաւնի շատ կայ... ասաց թուժօն, բուեր էլ կան... Գիշերը կը վայեն, լրացրեց նա թաւ ձայնով ու ծնօթը դրեց գաւազանին։

Արևը մայր մտաւ, երկնոյեան մշուշն իջաւ, բայց ես ու թուժօն դեռ եկեղեցուն մնէք։ Աւեր, լայն լուսա-մուտից երևում են Խալդական լեռնաշղթայի հսկայ ստեւերները և նրանց ոտների տակ կարմիր լլուրները, որոնք կամացուկ մաշում, լուծւում են կիսախաւարի մէջ։ Աւելի մօտ, հարթութեան վրայ մի հաստիկ ծառ է օրօրում արտերի մէջ և նրանից վեր մի պատառ ամպ

է լողում տարտամ, վարանոտ ճամբորդի պէս, որ իր մոլար ճամբան է փնտրում անհունի մէջ։

Անկնող ցորենների խշշոցը և մանգաղի մեղմ զրնգոցը մեզ է հասնում հովի թւերով և գիւղացիք դեռ հըն-ձում են, դեռ վաստակում են...

Աւերակների շուրջն իշխող այդ աշխատանքը, որ կեանք ու կենդանութիւնից, յոյս ու եռանդից է խօսում, պարարիչ խոհերով համակում է իմ հոգին և զրնգոցը գերանդու, և խշշոցը խուրձերի, և մեղմ զրոյցը հնձուրների, բոլորը միասին մի իմաստ են ստա-նում, որ հեգնում է մահը, աւերածը, յուսաբեկու-թիւնը։

— Զա՛րկ, զա՛րկ այդ գերանդին, ո՞վ բրտնաջան վաստակաւոր... Թո՛ւժօ, Թո՛ւժօ, հունձն աղէ՛կ է այս տարի։ Թուժօն գլուխը բարձրացրեց, նայեց հեռուն։

— Է՛՛հ, աղէ՛կ գէշ, մէկ չէ՞, ասաց նա, դատողն ո՞վ, ուտողն ո՞վ. ու ծեր գլուխն այս անգամ զայրոյթով իջաւ գաւազանին. էլ չէի տեսնում դէմքը, բայց խա-ւարի մէջ դեռ լսում էր նրա ձայնը. Թուժօն խօսում էր ինք իրան, կամացուկ։

— Համա փերիշան ենք... Բռնաւորի օրով փերիշան, ասին ազատութիւն եկաւ... էլի փերիշան... Է՛՛հ, Փայ-դայ չկայ...

Մռա՛յլ, անհամբոյր ծերուկ... նրա այդ թաւ ձայնը խաւար, աւեր եկեղեցու մէջ, ինչպէս գերեզմանից՝ ճըն-շում էր ինձ։

Դուրս եկայ։

Արևելքում բանձրացաւ լուսինը. և նրա գունատ ցոլքերի տակ աւերակների երկարուն ստեւերները սգա-ցող եղերամայրերի պէս իջան, գերեզմանների վրայ փռւեցին, ու լուռութիւնը դարձաւ այնպէս խորունկ, այնպէս խոհուն. հո՞վ է հեծեծում աւերակների մէջ, թէ՞ մէկը իրօք լալիս է. շուրջս նայեցի... միայն թու-ժօն էր առաջս միշտ իր հաստ գաւազանին յենած ու աւերակները լուսնի պաղ ցոլքերով սքողած՝ որպէս ձերմակ պատանների մէջ. կարծես զողզողում են, գա-լարում և խորհրդաւոր եղերամայրերը շարունակում են փարել հինաւուրց շիրիմներին։ Հեռուն, լայնարձակ դաշտում գունատ կիսաստեւերներ, թրթռուն լոյսեր խաղում են, իջնում, բարձրանում, որպէս անհանգիստ, հալածական ոգիներ։ Ու ափանջիս հնչում են մռայլ ծերունու չարագուշակ խօսքերը։

— Փայդայ չկայ, փերիշան կէնեն...

Շինարար, բայց ընկճւած, պարտւած ցեղի կսկիծի ձիւն է այն, որ բարձրանում է աւերակներից, գերեզ-մաններից։

Հստեցի մի քարի վրայ ու անձնատուր իմ խոհերին՝ նայում էի հեռուն։ Թուժօն կրկին մնաց կանգնած, կրկին նայում էր ոտների տակ ու ասես իսպառ մոռա-ցած իմ ներկայութիւնը, խօսում էր ինքն իրան։

— ... էլի գիշեր էր, էլի լուսընկալ, էլի հով ու զով... վախ խայե՛ր... աշխատանքից դարձանք, էլի արտ ու հունձ կար, ցանք ու վաստակ, դարձանք ու էսա սև փոսը փորեցինք...

Թուժան գլուխը բարձրացրեց ու գաւազանով ուժգնօրէն հարւածեց գետնին, ուր սովորական մակերևութից մի փոքր ցածր, բաւական ընդարձակ քառակուսի ծածկւած էր թանձր խոտերով։

— Հա, աշխատանքից դարձանք, էլի էսա իրիկան պէս խորոտ իրիկուն էր, չորս դեհէն վրաներս էկան մեր հարւանները՝ թիւրք, չէրքեզ... Ու հարիւր տասներեք տղամարդ ընկան էս վերան գեղից։ համա էսա փոսի մէջ պարկած են... Հարիւր տասներեք տղամարդ, վախ, վախ... հանգիստ ձեզ, հանգիստ ձեզ խեղճ ջահիւղիւաններ...

Ոտքի ելալ, առաջացալ դէպի այդ սև վիհը, ուր կանգնած էր Թուժան, գլուխը բաց, ճերմակ մազերը հովին տւած և լուսնի ցոլքերի տակ գունատ ու խորհրդաւոր, որպէս սուեր ու մեղմիւ սրբում էր աչքերը...

— Կ'ըսեմ ֆայդա չկայ, փերիշան կ'ենեն... աշխատանքից ֆայդայ չկայ էսա վերան աշխարհի մէջ։

Սասանւած էի...

Տասնեվեց տարի առաջ կատարւած Մեծ Եղեռնի մի արիւնոտ դրագն էր այս, որ անողորմ, դառնացած ծերունին, որպէս ջախջախիչ փաստ իր յուսաբեկութեան՝ առջևս հանեց։ Ու ինքս էլ Թուժոյ պէս ոտներիս տակն էի նայում, այս ազագուն, չորացած խոտերին, որոնք ծածկում էին այնքան մատաղ կեանքեր վաղաժամ չորացած։ Ոտներիս տակ հողն էր եռում ու խոտերի ու քամու շշուռնն ու սլսլոցը հոգուս մէջ հնչում էր, որպէս կենդանի զրոյց, մի սև հէքիաթ, որ ասես ոչ սկիզբ ունի և ոչ վախճան։

Գլուխս բարձրացրի, Թուժան էլ կողքս չէր. մերթ ծածկելով սուերների մէջ և մերթ լուսնի շողերով ողողուն, նա երերալով գնում էր դէպի գիւղը, ապա իսպառ ծածկեց։

Հեռուն, բաց հարթութիւնը դողող աստղերի տակ՝ լուսնի արծաթ մշուշի մէջ հեռում էր մեղմիւ, աւերակները սրթսրթում էին իրենց լուսացնցուղ ճերմակ պատանների մէջ, առջևիս մահաշուք փոսը լուռ մխում էր ինչպէս մի հսկայական սև վերք մայր երկրի կրծքին, և քիչ անդին՝ դպրոցի շէնքն էր բարձրացնում իր սպիտակ զանգւածը, որպէս հմայիչ ժպիտ։

Կեանքի, լոյսի ժպիտը, որ իշխում էր մահւան աւերածի, յուսաբեկութեան վրայ։

Նորից նստեցի մի քարի վրայ, գլուխս ձեռքերիս մէջ առայ և մեր պատմութիւնը, մեր ցաւագին պատմութիւնը իր բոլոր արիւնոտ յեղյեղումներով, որպէս յոգնած վիրաւոր ուղտերի կարաւուն, եկաւ անցաւ աչքիս առաջից։ Այս աւերակները, այս մահաշունչ փոսը, ուր հա-

րիւր տասներեք մատաղ կեանքեր են հանգչում, այս հոյակապ դպրոցն իր ժպտով և այն դժբախտ Թուժան իր մահագուշակ «փերիշանով» մեր ամբողջ պատմութիւնը չէ՞, մեր դաժան, մեր անողորմ պատմութիւնը։

Յամառ աշխատանք, ստեղծագործելու, կերտելու անսպառ եռանդ, մտքի, արւեստի սքանչելի խոյանքներ և յետոյ... անակնկալ, վայրագ աւերած բարբարոսների ձեռքով, ողբ, յուսաբեկութիւն, գերեզմաններ, մի ամբողջ աշխարհ՝ քար ու քանդ, մի ամբողջ ազգ՝ բռնաւեր, փերիշան... ու կրկին վերաշինութիւն, կրկին յամառ ու անդուլ աշխատանք, և՛ մուրճի շառաչ, և՛ մանգաղի զրնգոց, և՛ զիւլ երգը հոտաղի, և՛ հօրովէլը շինականի... մինչև մի նոր աւերած...

Եւ այսպէս դարե՛ր, դարե՛ր, դարե՛ր...

Ո՛չ, ծերունի, դու անողորմ ես, մի քամիր մեծ, պարտիչ յոյսի վրայ քո դառնացած, քո տանջւած հոգու թոյնը. փերիշան կ'անեն, էլի կը շինենք, կը խորտակեն, կրկին կը բարձրացնենք, մինչև որ բարբարոս, արիւնածարաւ կատաղութիւնը ինք գինքը լափի ու չքանայ, մինչև որ մոլեգին վայրագութիւնը իր սեփական միսը բզկտի ու ընկնի լէշացած, մինչև որ յաղթանակի արդարութիւնն ու իրաւունքը։

Եւ կը յաղթանակի, որովհետև անիրաւութիւնն ինքն իր մէջ է կրում իր մահը, որովհետև քանդումը, աւերը գերեզման է յափշտակիչների ու աւերիչների, ջարդարանների։

Հնձուր տղամարդիկ ու կանայք դանդաղ ու լուռ շարանով եկան ու անցան առաջիցս։ Նրանց գերանդիւններն ու մահաղները փայլում էին լուսնի ցոլքերի տակ, կայծկւում ու ժպտում աստղերին, երկնքին...

Ու յարգանքի, պաշտամունքի մի հզօր զգացմունք համակում է հոգիս դէպի այս լուռ վաստակաւորները, որոնք չգիտեն, չեն էլ գիտակցում, որ իրենց անյայտ ու համր ճիգերով լռելեայն զարդարում են շինարար, զգաստ ցեղի ամենէն վսեմ աւանդութիւնները, աշխատանքի, ստեղծագործութեան դիւցաղներգութիւնը։

Ո՛վ քրտնաթոր, վաստակաւոր ժողովուրդ, որ հարիւր տասներեք խողխողւած զաւակներիդ վիշաք հոգումդ և արդար ցասումն ատամներիդ տակ փշրելով, դեռ գիտես ցանել, հնձել, վաստակել, գիտես բարձրացնել այս իսկ աւերակների մէջ լուսոյ հսկայ այս կառուցւածքը... ահ, դու պիտի կարողանաս նաև յաղթանակել, և՛ բարբարոս, արիւնխաւն թռնութեան ողնաշարը խորտակել։

Կերտի՛ր, կերտի՛ր, ո՛վ քրտնաթոր ժողովուրդ ու ծառացիր նաև, որ քո ստեղծագործական ճիգերի հոյակապ կառուցւածքը փերիշան չ'անեն բարբարոսները։

Տ Ա Ր Ա Գ Ի Ր

Ք Ա Ղ Ա Ք Ա Կ Ա Ն,

ՅՈՅՍԵՐ ԵՒ ՅՈՒՍԱԽԱՔՈՒԹԻՒՆՆԵՐ

«Ռուսաստանը իր ձեռքն է առնում հայկական դատը», «ռուս կառավարութիւնը պիտի զնէ հայոց հարցը Լոնդոնի դեսպանաժողովում, պիտի պահանջէ յայն ուէֆօրմներ, ինքնավարութիւն, ավտոնոմիա»... Մի ամսից ի վեր պաշտօնական ու կիսապաշտօն օրգաններ, կաթողիկոսական պատէրարկներ և մասնաւոր անհատներ տարածում էին հռանդով այդ լուրերը... Ամենէն սկեպտիկներն անգամ ստիպւած էին մի վայրկեան հաւատալ ու մտածել, թէ մի՞ գուցէ յիշուի «նոր կուրս» է սկսւում հայոց հարցի նկատմամբ Պետերբուրգեան շրջաններում, մի՞ գուցէ, վերջապէս, Ռուսաստանի վարիչները համոզուել են, որ ժամանակ է դադարեցնել հակահայկական քաղաքականութիւնը և փոխանակ արգելք լինելու թիւրքահայոց ուէֆօրմների իրագործման—ինչպէս որ եղել է լօրանօվեան օրերից ի վեր—նպաստել այդ չարատանջ հարցի լուծման, չը գրգռել երեք միլիոն հայ ժողովուրդը, որ ամեն տեղ հանդիսանում է ռուսական կուլտուրայի ու առաջխաղացութեան գրօշակակիր...

Բայց ահա արդէն ծայր է տալիս յուսահաբութիւնը և նոյն ռուսական պաշտօնական անձերն ու օրգանները, հայերին հանգստացնելով, համբերութեան յորդորներ տալով հանդերձ՝ շեշտում են, որ Լոնդոնի դեսպանաժողովի օրակարգի մէջ՝ տեղ չկայ հայկական խնդրի համար...

Դարձեալ *rolle-fare*... Ահագին աղմուկ, թմբկահարում, խոստումներ ու խրախոյսներ, կաթողիկոսական յայտնի, ցուցարար պատրաստութիւններ, յաջաւորող Ռուսաստանի ու Եւրոպայի— և դարձեալ... լեռը մուկ ծնեց։ Հայաստանը սոսկ կարմիր խրտուիլա՞ն էր, որ Պետերբուրգը ցուցադրում էր Աւստրիային ու Գերմանիային՝ մշելու համար վերջիններիս դէպի զիջող քաղաքականութիւն՝ բալկանեան սլավոնների վերաբերմամբ... Թէ գուցէ ա՞յլ «ծրագիրներ» կան...

Այսպէս թէ այնպէս, դա մի նոր ու դառն փորձութիւն էր մեր մի կարգ հայրենակիցների համար—մի պաղ ջրցան...

Յուսահաբութիւնը աւելի ևս ծանր ու ճնշող հանգամանք է առնում՝ քիչ առաջ հրապարակ նետւած սէնսասիօն տեղեկութեամբ, որ բառ առ բառ ծանուցանում էր

«Ռուս կառավարութիւնը գիտաւորութիւն ունի մտցնելու Պետական Դումայի մէջ առաջարկ՝ վերաքննել «Պօլօթենիէ»... այն մտքով՝ որ հայոց կաթողիկոսի գործունէութիւնը համաձայնեցւի պետական իշխանութեան պահանջների հետ։ Եւ որովհետեւ Պօլօթենիէի հետ կապւած են Ռուսաստանի հայ ժողովրդի հոգեւոր-մտաւոր-բարոյական

կարիքներին գահացում տուող շատ հաստատութիւններ, ինչպէս գալոսցը, ընտրական սխտեմը, ուստի պարզ է, որ Պօլօթենիէի վերաքննութեան խնդիրը մի առանձին կարևորութիւն է ստանում հայերի համար»...

ՈՒՍԱՆՈՂԱԿԱՆ ԽՈՐՀՐԴԱԺՈՂՈՎ

Ողջունելի են Եւրոպայի մեր հայրենակից ռուսանոցները, որ կամեցան արձագանք տալ համազգային տրամադրութեան և հաւաքեցին — թէև սահմանափակ թւով — խորհելու իրենց ձեռք առնելիք միջոցները, վայրկեանի պահանջների համեմատ խորհրդաժողովը տեղի ունեցաւ Լոնդոնի մէջ, մասնակցութեամբ Պարիզի, Նանսիի, ժընէվի և Լոնդոնի պատգամաւորների, խորհրդակցութիւնը տեւեց երկու օր, ընկերական լիակատար համերաշխութեան մէջ։

Ընդունւած որոշումները բազմաթիւ են. ահա նրանցից մի քանիսը.

1. Պրօպագանդ անել արեւմտեան մամուլի մէջ՝ հայկական խնդիրն արծարծող յօդւածներով։
2. Աշխատել կազմակերպելու միթիւններ ու դասախօսութիւններ՝ այլ և այլ քաղաքներում։
3. Պարտադրել իւրաքանչիւր քաղաքի ռուսանոցական միութիւն՝ իր միջոցներով տարածելու Պարիզեան ֆրանսերէն թերթը։
4. Չեղարկել ռուսանոցութեան ու գաղութների մէջ դրամի հանգանկութեան և յատկացնել նպաստները թիւրքահայ ժողովրդի ինքնապաշտպանութեան։

ՀԱՅԱՍՏԱՆԻ ՍՈՒՐՀԱՆԴԱԿ

Բաղում եմք մի բանի տեղեկութիւններ խմբագրութեան մէջ ստացւած վերջին նամակներից.

Վան, դեկտեմբ. 16

Շանր տպաւորութեան տակ վերադարձան մեր հաղար գիւղացիները, որ Ռաֆայէլի սպանութիւնից յետոյ թափւել էին քաղաք և դիմումն արել կուսակալին։ Դրական ոչ մի արդիւնք այդ դիմումներից։ Զուտ ու վրէժով լցւած, տուն դարձան և արիւնը արիւնով լացին, այն էլ իրենց ձեռքով... Իմացաք արդէն, որ Ռաֆայէլի սպանիչներէն գլխաւորը, Հաջի Խաղուբ, իր որդին Ռաշօ, մէկ ոստիկան և չորս ուրիշներ սպանել են հայերի ձեռքով, Խրոխտենց գիւղի մօտերը։ Կառավարութիւնը իսկոյն խուճապ հանեց—այն կառավարութիւնը, որ մտաւ մասին չիփեց Ռաֆայէլի դահիճներին պատժելու համար... Այլին հարեւաւոր զօրք, ոստիկան ու յատուկ քննիչներ ուղարկեց Կառլաո՝ քննութեան համար։ Բայց... բնութիւնն ինքը արգելք եղաւ. ճամբաները գոցւած են։ Սատանան չի կարող այժմ

մտնել Կառկառի խորքերը, Հայերու կողմից բան չի եղել, ամբողջ Խորխտենց գիւղը փախել էր մօտակայ գիւղօրայքը Կեռեւանքը շուտով կը պարզւի:

Դէպքի ապաւորութիւնը շատ լաւ է հայերի մէջ և շատ ծանր՝ կառավարութեան վրայ:

Կառավարութիւնը, մասնաւորապէս վալիին, որ մի վատ քիւրդ է, սկսել է պրօվօկասիօններու Իբր թէ հայերի մէջ կան ռուսական գործակալներ...

Ա—Մ

Էրզրում, 1) դեկտ.

Հայաբնակ վայրերի մէջ... տաքնապը արձակել է բոլոր սանձերը: Ժողովրդի տակաւնները, թալանչի խուժանավարները մի յարմար առիթի են սպասում՝ մասսային ջարդեր սարքելու: Առ այժմ խոշոր, արտակարգ ոչինչ չկայ: Ասում են արտակարգ, որովհետեւ անհատական սպանութիւնները, մասնակի կողոպուտն ու թալանը այս քամբախտ երկրի համար վաղուց ի վեր սովորական երևոյթների շարքն են անցել և մարդիկ կարծես հաշտել են դրանց հետ...

Որ քրդերը չափազանց երես են առել վասպուրականում, դա ճիշտ է: Նկատելի են քրդական շարժման նախանշաններ բացարձակապէս ըմբոստանում են կառավարութեան դէմ: Լուր կայ, թէ մի գաղանի ձեռք ղեկավարում է այդ շարժումը... «Քրդական վտանգը» քանի գնում—լայն ծաւալ է ընդունում: Թիւրք կառավարութիւնը—վախից է արդեօք—ի տեղի զսպելու, կօկէտութիւն է անում քրդերի հետ, ամեն կերպ սիրաշահում է...

Աւելացրէք և այն՝ որ թիւրք խուժանը ևս սկսում է գոգոռումի վտանգաւոր նշաններ ցոյց տալ, Թիւրքիոյ պարտութեան լուրերի ազդեցութեան տակ...

Առ այժմ կրքերը զսպւած են երևում. ինչ կը լինի վաղը... գուշակել դժուար է: Կարնոյ դաշտի ժողովուրդն ևս չափազանց անհանգիստ է: 1895-ի ջարդի միջառանձը այսօր էլ ճնշել, պաշարել է հայ գիւղացու միտքը: Թիւրք գիւղերի մէջ նկատւած են «Ջհաթ»ի ագիտատօրներ...

Յ—Տ

Կիրասուն, 5 դեկտ.

Նոր թողի երկիրը... Անիշխանութիւնը կատարեալ է: Ապրում ենք չափազանց կարեւոր մի ժամանակաշրջանում. 1908-ի թիւրքական յեղափոխութիւնից ի վեր, սա ամենածանրակշիռ մօմէնտն է, մասնաւորապէս հայերիս համար... Հայկական գաւառների մէջ թալանն ու սպանութիւնը սիստեմատիկ բնոյթ ունին: Քրդերը այլ ևս ոչ մի կարեւորութիւն չեն տալիս իշխանութեանը, նրանց յանգնութիւնը հասել է այնտեղ, որ հայերի վրայ ձեռք են բարձրացնում անգամ Կառկառ գաւառի մէջ, ուր հայ տարրը նոյնիսկ հին ու-

ժիմի ատեն ուժեղ է եղել և գրեթէ ազատ բռնութիւններից: 16 խոշոր հայ գիւղերի դիմաց կան ընդամենը 4—5 քրդական գիւղեր:

Մուշ-Բիթլիսեան շրջանի դէպքերը նախանշան են քիւրդ-հայկական գալոց ընդհարումի... Գարնան կարող է նա պայթել:

Ինչ պիտի լինի երկրի վիճակը այսուհետեւ... Այս հարցումը յաճախ ենք տալիս մեզ: Սահմանադրութեան առաջին շրջանում չափազանց լաւատես եղանք, և մենք կանգնած էինք համաթիւրքական յեղափոխութեան ու վերածնութեան տեսակէտի վրայ: Տարաբախտաբար, մեր անկեղծ ոգևորութեան յաջորդեց դառն յուսահարութիւն: Ճիշտ է, որ սահմանադրական այս տարրական ազատութիւնների մէջ մեր ժողովուրդը սկսեց առաջագիմել, բարգաւաճել. բայց միւս կողմից, եկանք այն տխուր համոզումին, որ երկրի մէջ չկան համապատասխան տարրեր՝ օրէնքի ոգով շարժելու, արդարութիւնը դատարանի, օրէնքի առաջ պաշտպանելու:

Ամբողջ պաշտօնէութիւնը, սկսած ամենապարզ զապթիէից մինչև միւրիւրը, գայմագամը վարակւած են կողմնակալութեան ու կաշառակերութեան ախտով և կատարելապէս անգէտ են իրենց պաշտօնի պահանջներին: Ամբողջ կառավարական մեքանիզմը փչացած, քայքայւած, անընդունակ է վերանորոգչական աշխատանքի: Այլ բան էր, թէ տեղական ապակենտրոնացմամբ, հայերի լայն մասնակցութեամբ գործի ձեռնարկէին: Դժբախտաբար, այդ բանը ներկայումս անհնարին է: Սպասել այս վիճակի մէջ նորէն 10—20 տարի, որպէս զի նոր տարրեր առաջ գան (այն էլ՝ պայմանով, որ Թիւրքիան մնայ սահմանադրական) — թերևս կարելի էր մի բան յուսալ. բայց դժուար թէ այդքան տարիներ անցնին առանց մեծ արիւնհեղութիւնների...

Թուում է թէ նոյնիսկ թիւրք ցեղի անմիջական շահը կը պահանջէ, որ եւրոպական միջամտութիւն լինի և եւրոպայի միջոցով առաջ տարւի երկրի վերանորոգման գործը, մինչև նոր, հասուն տարրեր ի վիճակի յայտնւին իրենց ձեռքն առնելու ղեկավարութիւնը: Բայց... քանի որ թիւրքերը, նոյնիսկ «երիտասարդ» կուսածները անկարող են այդպիսի համարձակ ժեստ անել — մեզ կը մնայ մեր գլխի ճարը տեսնել: Քիւրդը պիտի շարունակէ զարնել. հարկ է պաշտպանել: Հարկ է հոգալ — ազգովին հոգալ — պաշտպանութեան միջոցներ...

Ս—Ս

